


元許文忠公至正集

柳田文庫

文庫11

D 93

8



至正集卷第五十七

碑志十四

文庫 11
D 73
8

27

8

010190548924

碑志十四

吟竹先生墓表

天臨儒學正顏士穎奉大父吟竹翁行實請曰大父墓三十三年
 多難奔走表於墓而未能亦惟僻左未獲攸記託其在今日乎予
 燭其誠序之曰翁諱奎字子俞吉州永新人唐魯公十九世孫父
 某迪功郎監南嶽廟母某氏迪功沒益勵於學咸淳丙寅以書魁
 湖南漕而不樂仕進文山文公嘗延至幕下德祐間文山起兵汀
 贛以書來招為之感泣而竟不起築室以居寓士文山扁曰觀遠
 至元丁丑故邑殘毀挈家避地百丈山鄉鄰多從之庚辰參政劉
 奉命來宥過刑故眾懼俱焚公奮袂曰人既予依則其命在予辭
 難其可偕進士胡幼黃深夜謁轅門抗論不撓劉為改容豪右註



誤且死雖素有隙者皆陰活之南北既一徜徉里閭復泮宮倡學
者與須溪劉辰翁中齋鄧光薦輩遊居雲外別墅自號雲外山人
門有萬竹日嘯詠其間學者稱吟竹先生至大戊申夏五月二十
二日疾革誠子孫曰吾年七十有四過人多矣安能仰藥求活吾
所為不可以訓汝曹當孝悌謹教私勿傷義貧勿廢學喪勿事佛
謹識吾言吾死無憾矣言訖而逝明年己酉十一月朔塋琴亭雙
塘原配譚氏先八年卒三子長居安士穎父也以經行為人師次
資深逢源皆業儒二女孫男八人士穎其長平生尚氣節家無餘
蓄而性好客物雖素好人欲之即與不靳歌詩跌宕可傳酒酣浩
歌舞劍以泄其磊砢之氣豈齷齪場屋之士所可比哉宋以文陶
冶一世其亡也文士不負國家炳炳乎若文山輩可數也然文山
有位者也若子俞者無位而有志者也方患難中奮出活人豈忘

情於世者乎其不應文山之招知時之不可為也然其磊砢之氣
又有不能自揜者焉亦叔世之奇士也銘曰

崑崙魯公萬古此忠慶源其深邈乎雲仍由柝于楨靡任不勝天
胡棄材山巔水隈予其歸哉四海一天乃誦乃絃以逸者年有清
維河有卷匪阿傷之如何雙塘之林鬱鬱其陰悠悠我心

贈通議大夫大都路都總管上輕車都尉清河郡侯謚莊惠

張公神道碑銘并序

贈通議大夫大都路都總管上輕車都尉清河郡侯謚莊惠張公
幼與先公同師王汝舟先生先生歸黃州先公最長為諸生服故
嗣教其徒公與焉公兄諱士豪娶有壬姑先公獨一姊往來尤數
公地則班也一為師生故事不少急赴德安軍民屯田總管謁先
公於鄂先公棄代躬致弟賻鄉親師友義死生不替卒十年子弘

請謚得今贈請銘諸碑公諱士傑字漢卿先世上谷人高祖誠徙彰德湯陰曾祖諱實千夫長沒於陣祖諱信有文行贈亞中大夫彰德路總管輕車都尉追封清河郡侯考諱崇好施予贈嘉議大夫大名路總管上輕車都尉追封清河郡侯祖妣李氏妣尚氏皆從封郡夫人初製國字學者通其字卒難其言公入胄監習其書又精其言甫冠從戍北庭辟帥府蒙古吏轉河南行省及格授同知潁州事官承事郎未終更辟中書史擢朝列大夫稱海宣慰使司都元帥府經歷陞中順大夫淮東道宣慰副使泰定甲子以嘉議大夫遷德安天厯戊辰進通議大夫同知察罕腦兒等處宣慰使司事副都元帥佩金符至順癸酉三月日卒官壽六十九塋湯陰西百里配楊氏封清河郡夫人弘蔭忠翊校尉南陽府同知高州事今河間縣尹次曰本曰敬曰紀女二皆適士族在北庭適朶

啖寇邊從戰有功潁地善潞治溝洫歲以稔修宣聖廟作兩廡稱海戎務方殷應接無滯戍卒多鄉隣貧不能歸者贖遺之淮東經賦營繕甲東南視成有法韓姓者毒殺其姪吏受賕誣其繼祖母趙氏汴省命讞之趙氏得白屯田課樹藝時稅斂歸豪右隱田三百餘頃增糧二千餘石西邊歲飢晁火灘部落從水牧它徙邊民為搖請賑得楮幣七十五萬緡始遂生集構三皇廟免公解就祭之襲此其為政之大概而仁民愛物之實也論治國者必先於齊家而仁民必始於親親公事親孝待兄弟友愛宗族貧弗給者周之失嫁娶者為嫁娶之此親親之實也親親而仁民仁民而愛物有本者如是夫嗚呼稱人之善必本其父兄師友名言也公曾大父以忠著大父以學著考以義著季父懋德尹二邑有惠政而世母趙氏又以孝節旌其門一門之教有素故其造就若是之懿也

銘曰

皇元肇文金篆玉書誕數煥章漸被海隅易得者字難肖者言心樂不融但窺其藩學惟基儒移是佔畢因其警悟濟以定力胄徒雜還乃獨邁倫其聲于辭宛然國人游更司譯始官倅郡力殫溝洫以教為政朔漠開閩距天萬里行間幕中戰勇佐理副節淮海于甸于宣爾賦惟期爾民弗寃屯田有方曰耕與守峙我廩庾壯我甲冑招亡餒殍無忝使節且使其民順帝之則篤念吾翁歲晚弗弛生省卒賻跋涉勞止屯膏未施偉績弗究孰顯其光而開厥後蕩水流潤松柏彌阡第爾子姓方至若川

故朝列大夫饒州路治中王公碑銘

秘書典簿王忬奉亞中大夫僉浙東海右道肅政廉訪司事杜東翼狀請銘顯考饒州路治中公碑有壬幼僑江南聞鄉耆名願承

教不得而其仕江南蜚聲騰實若饒州公者乃熟耳考信者也近鄉里與忬遊春盎王溫學專行修益信其家訓有素考信不戾焉乃序而銘之公起家江淮宣閩掾除江浙行省理問知事陞台州路經歷辟掾江浙行省擢永嘉縣尹入為工部主事宣徽院都事出知崑山州遷饒州路治中卒職七轉官累進至朝列大夫其在永嘉地濱海饒鹹鹺豪戶若民通島夷貿鬻官弗能制軋於運司總府前令職是失職者相望公戒嚴條禁察尤者置之法姦偽以息或誣張明一為盜逮三十餘人獄具察其冤釋之同官果爭公曰理冤令職也苟失出令自坐未幾得真盜其人相率繪公像祠之作邑七年如初至臺剡上賜官一級白金五十兩由是入朝著尚書省方變法冬官事尤禁糶酬決惟允有爵秩金幣之賚皆不受宣徽上玉食恃不考計並緣為欺公毫髮不貸眾忌之秦朔漠

稽部落戶數以重遠中傷之即日就道廷議優擢以老疾請郡遂有崑山之命時數田江淮使者暴急有司承風旨抑民虛承江淮騷然公訟微分覈慨然曰民瘼極矣吾豈能愛一身而置民死地耶上不便數十事職者避之損虛糧萬餘石州治更徙廟學未作乃倡衆曰京師至下邑莫不有廟以祀有學以教况賓興有詔而吾州藐藐其何以副上意乃作殿廡門墉齋舍廩庖靡不完美以舊學為玉峰書院又建三皇廟社稷壇除蕩田重科推抑兼并小民以甯上考書最饒大郡也席未煖而沒惜哉平生砥行立名風儀峻整事繼母三十年奉寡嫂至沒不衰廉而好施祿入無餘彰德鄉里廟學祭器簡闕買銅脩鑄數千里致之其設施章章如是而壽止六十有二其乞補外時年五十餘非老也病也朝官速化補外鬱滯常情怵所利忍恥力求老死旅食而不悔者接迹也有

昇之而不受強之而力却者乎若公者其有所見乎豈內職雖利資級浮沈底僚懲其已施知其設施之難而一郡之專有以行吾志而及吾民乎吾志苟行資級利不利不校也嗚呼若公者可不謂賢矣乎公諱安楨字吉卿安陽人卒以延祐七年 月 日塋以至治元年三月十二日里曰司空從先塋也大父以上金亂譜亡考諱 贈奉議大夫驍騎尉追封湯陰縣子妣程氏李氏配張氏繼閔氏並封湯陰縣君閔恭儉靜嘉訓子有法後公十年卒二子忤以才譖聞駁駁其進矣愷其次也女二銘曰
于嗟王公半刺考終孰尊其始孰輒厥止素履不愧濯濯進退匪難匪急惟行是即有醜病源有汙萃寃嚴明政舉爾釋爾愈郡疑底信軋者以振拔之內列震來不讐窮漠有稽我馬駢駢閔勞奚腆職也宜勉損下益上為損之象寶由肆毒我躬違恤欲熏善良

乃廟乃庠生周易守有沒無朽移忠由孝蓋食其報清修不忒有子實則西山巖巖洹水其南耐藏無忝五福斯斂流澤溉浸三槐有陰我銘弗諧百世是法

故通議大夫江西等處權茶都轉運使萬公神道碑銘并序
公蒙古耐溫台氏小字萬嘉閏長因為名國俗也既華學友字以國卿其家廣平蓋曾大父天造初穎右部分戍地也大父忽珊從討李壇攻襄樊鄂渚皆有功贈中順大夫同僉樞密院事上騎都尉范陽郡伯配欽察氏葉氏皆追封范陽郡君文驀克篤右衛親軍百戶達魯花赤佩銀符陞福州新軍千戶達魯花赤佩金符贈亞中大夫僉太常禮儀院事輕車都尉范陽郡侯配欽察氏追封范陽郡夫人德善履歷具神道碑公守河間有壬侍罪政府江西茶政不修擇習而健康而通者為都轉運使以拯之公嘗貳其司

有聲乃薦之廷議翕然既奏可傳符至郡俄以疾卒至正二年四月二日也五月二日墓曲周縣先塋壽六十有五明年九月孤壽安走安陽請銘哭不能禁拜已出行實復咽不能語有壬交公厚望其孤已泣又洞其懇誠益為之動遂相與大哭久乃始克讀其狀其善狀不能悉也公居敵長世祿當襲以讓弟邠懷服勞宿衛除山北道肅政廉訪司照磨兼管勾承發架閣庫以太常憂歸服除調山東道賑飢有功南臺碑為行人俄除利用監知事又改南臺管勾承發照磨兼獄丞拜西臺監察御史論列剴切僉雲南諸路肅政廉訪司事麗江宣撫達魯花赤燕只不花橫甚逐同官激叛部內朝廷知之始懼而亡匿公以計誘出罷之復其同官叛者以息行却建廟學凡二十四所修廢驛二十二歸省太夫人京口及侍其疾扶柩至廣平復如京師遷祖考妣合塋先塋改僉江西

道又改燕南皆以憂不起服除改河南道天歷之警行省臣與廉訪司協議公謂潼關守不可緩承制除河南行省郎中出守潼關文皇道汴錄其勞除河南道副使潼關失守夜馳至行省發蒙古軍四千餘人又借民丁出帑資假富室以足軍興鼓行而西遂復奪之會朝廷遣使退其師還卒掠民子女皆奪歸其親賜綵段上尊初也先尼將兵禦西師屯彰德約備芻粟已竭宿留不進士卒將大肆掠公開諭以理遂移衛輝境蓋始約有備之地一郡幾亂賴公以免擢同僉中政院事理財江浙仍有金帛之賚改儲政院判官拜監察御史按覆諸道風采肅然為戶部郎中楮幣壅滯督焚以通之倉儲積弊立法以覈之閩中去京遠選人間關故事三年遣使即江浙省銓授公以選行就除行省左右司郎中茶司復立授同知江西等處權茶都轉運使司事分治湖廣江西江浙課

以登商旅以通官庶以不擾入為戶部侍郎復通州倉糧三十萬石行蜀拯鹽法之弊人謂得宜陞內宰甫月改河間路總管兼諸軍奧魯總管管內勸農事首建學宮若干楹百廢修舉胥畏民悅權茶劇任知公者咸謂必稱而倏然長往惜哉積階自將任佐郎至通議大夫配冊竹氏封范陽郡夫人又娶趙氏在南臺每憂無子有妾解之曰以子之心不患無子後果生子壽安也慮而有立室而有出公可無憾矣女四人適國子生完者溥化江浙行省理問邁五答兒宿州同知王敏行一未行弟二人那懷自襲官有聞四轉至鎮江上萬戶府達魯花赤階大中大夫曰曲出宋氏出也公幼有志節襟度宏朗滑稽微中機鋒叵測分部上京它曹官莫不舍其署雜還相從其為人悅慕若此而疾惡若仇辭色不能隱亦用是來議者之口焉左警述院判官王克觀洎其家五人相繼

死為具載歸墓之道高郵十路都萬戶府知事龍寶臣出使卒殯水濱捐金顧江道士遷其柩歸墓曲周顯官有放其子者孫且十歲一日過之因言父子天倫甚至乃感然問曰君子有幾歲公曰尚少當令來拜明日挈其孫往其人撫愛不釋公曰此兒與君有骨肉親錯愕久之乃語之曰此君之子某之子也遂大慟奉楮幣銀酒具為謝受之還遺其子卒為父子子今亦顯微公則天倫或幾乎絕矣其篤於行義若此與大權貴舊而狎不敢遠亦不近之免趨附之速其讀書好文蓋太常教之有素而復天姿穎悟喜交儒士灼然有見於道義故確然無間於吾徒也山北南臺暇必相從有酒必共先太夫人棄代維揚自京口來賻南歸過之戀戀不忍別騎送至金陵東郭始泣而歸中途宿旅即疲甚而寐必踞蹠使寤笑談達曙目不少瞑翼日神觀不少昏疲京師僕僕多事亦撥冗過從又同扈上京交游厚且久他人不及也銘復何辭銘曰有紫其服有金其符賞延在身乃及友于視其不取見其有餘紆青幾時冠鐵衣朱逢涌孰禦載馳載驅投紱滇池萬里接浙嘗藥視舉獲殫子職衰經游命禮經是式分節河南邊聲孔劇力障其衝旋復其失兩為地官不競不絀廩枵而克泉壅而流惟瀛大郡實為甸侯先教後刑學宮以修昔貳茗政衆與能事俾長雅司以修厥廢軺方脂牽奄忽云逝聞者盡傷矧予夙契于銘不愧予善實多剛而不虛從而不可不膠于習不流於和有美承家其冠已莪曲周之澤發於盈科刻文樂石百祀不磨

至正集卷第五十七終

至正集卷第五十八

碑志十五

故西華縣尹楊君墓志銘

君諱伯循字循禮姓楊氏世居湯陰鶴山曾祖諱寶祖諱林始遷安陽壽八十七妣韓氏壽八十五考諱青字才卿善廢舉用是豐裕壽九十二旌高年耆德妣梁氏壽八十九長子永福能世其業次君也起家冬官行人除曹州成武縣主簿官進義校尉有惠政邑人紀之碑終更人不能忘又為去思碑改濟甯路金鄉縣主簿進保義校尉益自砥礪風紀交薦其能民又紀之碑陞忠顯校尉京畿萬斯南倉監支納親老不赴二親沒服闋擢陳州西華縣尹需次田里至正三年七月二十二日以瘍卒年五十有三是年八月二十八日柩相縣固先塋配和氏子二人長曰振次曰郁女一

人未行孫堅孫甫四歲余始識循禮京師熟其誠慤故鎖屑皆護之來鄉里才卿已九十餘時獨騎相過健捷如少年予今之來才卿已逝可念而循禮適赴調歸話存沒相慰勞俄別去行田遂不起振以總管杜公叔愚狀偕來請志嗚呼循禮家饒羨有子且有孫沒可無憾予獨悲其祖考妣考妣皆以壽稱循禮又鄉里稱善人者宜享上壽而僅若是惜哉又悲其兩在貳佐見之設施能使邑民悅服薦剡迭上使地居得為吾知其効視已試必倍得其地矣而卒不得施西華之民視成武金鄉之民何其不幸哉始循禮崎嶇棄養干升斗之祿以顯親也七品法當推恩其親格已及矣而親與身皆不待西華之民不幸孰與循禮之不幸耶是雖人力之所不及而又不能不為之悲焉銘曰

貳邑不卑厥聲四馳長人可為乃不獲施兩世四人兒齒黃髮心
有弗究孰為是怒西南之原萬枳維藩祖考是從體魄孔安念子
父子過從歲久子壙我銘是亦子壽

故濟甯路醫學教授李君墓碣銘

醫之為術重矣乎民蹈於辟懲復生復屬之不可覆讞究極得其情且不忍世乃有以濟民操是權者寒溫實虛毫釐千里為之術者可不謂重矣乎周疾醫治疾養以五味穀藥眠以五氣聲色兩以九竅參以九藏法若是其備也書其所以稽事制食責若是其至也生民之遂其壽宜哉我元擴好生之德建學立師徧乎天下視周制有加焉至元後庚辰有壬赴召道參戶病暍醮使以教授李君之會薦所苦尋愈癸未再見始悉其蘊久乃出其父教授君行實請銘而又悉其家學之有自也君清州會川人大父諱仁父諱琮三子曰祐曰忠曰克讓字仲謙君也穎悟嗜學九歲喪父

人異其哀事母以孝聞外舅張儀之世業醫有聲燕趙間從學有得醫院檄為滄州學正陞河間路教授講席凝塵慨然曰我職雖輕責不輕也奮然以師道自任郡守洞其學始尊禮之由是學者沓至迄有著效天竺僧貴至司徒欲與俱北以老母辭職教八年移真定母憂以能喪聞服除調衛輝又轉濟甯致仕歸居參戶密迺鄉里生齒繁有以行其施扁齋曰庸因自號云至正二年三月十九日卒於家壽八十有三四月三日塋會川孝感原配張氏前十年卒祔焉子三人曰瑞曰端皆早世曰亨之會也仍河間教授孫男二秉直業儒麓早世女一尚幼君為人和易頎而潔暫冠服甚都人望而敬口無調謔手絕奕弄請求塞門貧富不二其徒多著有為國醫者士議君為醫根儒故其造詣非淺淺者所能企及五十年人活叵計使書其所以稽事制食庶幾無愧者乎陰德以

活人為大孫思邈極言陰陽報施豈誣也哉君活人多未食其報亨有子業儒其在是也夫銘曰

軒岐奧義傳昧謏聞不根於心猶蓀弗芸而歲其喪有幾傳昧之患仆則莫起大聖垂訓灼如日星學焉不精旨索冥行天闕壽域官司建設其名其章遂與儒埒紆青滔滔一命是榮孰究其職孰半其能宋清藥市清風柳筆以而之能辭其可釋徵而在人顯而在天有報無忒時或後先八十三年天不爾嗇孝感之原尚沛其澤

贈朝列大夫秘書少監騎都尉安陽郡伯莊公墓志銘

同知順德路總管府事莊溥授其弟封同知林州事誠行狀論於郡人許有壬曰先子見棄且三十年塋若祭雖若可以為說者而納壙無銘有善弗章今不幸母復見棄啟祔有日吾母之善不可

無志也吾母不可以無志吾父可以無志乎因吾母之祔啟吾父之壙而納之銘銘復有託豈遲速有待而天假以今乎溥哀經不敢違次以請幸哀而賜之銘有壬不及識溥父交溥久知其人在里聞知其家銘亦宜哉莊氏之先潞州上黨人至後徙彰德安陽俊生榮榮生信字信甫是為溥之父以溥貴贈承直郎禮部員外郎進奉議大夫太常禮儀院判官驍騎尉安陽縣子朝列大夫秘書少監騎都尉安陽郡伯貌偉而度宏喜施而不責報兄弟四人友敬著一鄉妣張氏教毓有法故不墮凡近使鄉里稱長者殫力治生家日充裕延師教子姪百口無間言再從子青洎弟妹四人無所依撫育勤至為之嫁娶焉故舊喪有貧不克舉者為擇便地具棺衾延祐三年六月二十八日卒於家年六十有一七月三日塋安陽河次村先塋配王氏同郡處士子文女封恭人進封安陽

縣太君安陽郡太君幼淑慧能誦書詩婦工繅極年十八歸莊氏事姑五十年不怠與諸娣居六十年睦如兄弟一門事仰成不以為勞賦獲有疾必躬視之至正四年閏二月二十一日棄代於溥官所壽八十有九是年五月二日祔少監墓二子溥其長幼多病鞠育尤苦甫冠俾入胄監肄業由伴讀貢士部轉集賢掾除承直郎懷慶路推官轉奉議大夫太史院都事陞朝列大夫為今官次本純篤克家一女將嫁而卒孫男二曰文暉幼未名孫女一姪男十四人姪孫文昭登至順癸酉進士第起家承事郎同知潞州事辟掾西臺轉中書右曹掾除工部主事文雅廣平儒學錄初溥南北踰躓欲養莫遂及調順德密邇鄉里奉板輿以行太君亦忻然就養而年在喜懼故惴惴欲辭歸決閏月二十日行而十六日遘疾遂不起為終天之憾然父母教子見其有成而享其祿養無睽

離之憂壽而考終於子婦之手人子之心其亦可以無悔乎然而人子欲親之壽甯有既耶壽不可力致也銘其善不使湮沒是獨不可力致乎銘曰

於戲秘書沒三十年發身施仁鬱而弗宣其鬱其宣蓋亦有時時罔克力曷云已而幽墟一閔沒齒泣血昔未止人茲焉同穴茫茫昊天踽踽孝子附傳有文親則不死世有兄弟乃閔于牆亦有婦姑勃礪若常一國幾人所慕巨室夷考或虧齊民何式父為賢父母稱賢母何以知之有子如溥嗟爾來嗣聿慎厥修以迓以續相從洹流

故漕運同知粘合公妻逸的氏墓志銘

夫人名瑞童系出逸的氏高祖察罕太師河南武宣王開國有功父必罕牙達陽行省右丞妣伯也倫內範恭肅夫家奕世富貴而

削華服儉夫人質稟懿淑濟以慈訓故成習異於人惟粘合氏為全世臣曰鈞我元中書左丞相子南合中書平章政事樂相風土家焉相人稱中書家平章孫世臣中憲大夫同知京畿都漕運使司事中憲以貴盛難昏夫人家亦偃蹇擇塚地均德齊二姓之好虎諧中憲祖妣妣皆逸的氏至夫人則姻連三世矣延祐乙卯九月于歸一門千口里南北連阡陌中憲廉於官漫不暇省需廉不費夫人直補移撥不使見缺宿臧老獲皆懼伏中書不幸四十年而卒夫人屏斥華澤勵節治家坐亦有常處田園經葺有加焉初封恭人再封威甯郡君至正四年甲申四月二十一日以疾卒年四十有六六月三日庚申祔湯陰小韓村中憲之墓一子祿童教不稍貸每戒之曰汝父幼冲失父母子然有立敬歷駸駸天遽奪去先烈烜赫繼承不墜責其在汝矣祿童服膺惟恪愆父養

不待冀得盡於母夫人之卒祿童適在京奔歸日已兩浹矣祿童以其友陸愷所述行實請銘予惟女德之懿世宜有聞徵諸鄉里昔南北分裂相直兵衝聚異合汙俗庇以偷而世變無常風移俗易唐宋而下女節義班班可考也朱子采顏氏一時之言而不知遺風之已殄也觀夫人之善則知吾鄉風俗之美漸摩之久有自來矣予與中憲交知夫人之賢且欲有以聲吾鄉之非昔也為之銘曰奢麗敝化貴驕速亡夫也不免女也何望脫襁怙侈世家席祿不慎厥居瓊建其覆威疏萬趾言不易刑制以閒雅截截戶庭我生不辰為未亡人一日未亡一門在身有子子遺常情溺私易愛以嚴是為大慈良人永逝教子有立而壽不昌而事斯畢

元故集賢侍講學士中奉大夫徐公墓志銘

愚交鄉人得善人徐公焉公由汴反鄉里病革但一再見至正四

年六月十五日薨夫人介其親請志其墓公諱爽字周臣其先武陟人曾祖考諱義金季遷安陽祖考諱瑋累贈嘉議大夫兵部尚書上輕車都尉東海郡侯考諱秉元朝列大夫同知建昌路總管府事致仕累贈中奉大夫江浙等處行中書省參知政事護軍東海郡公祖妣王氏蔣氏妣續氏皆追封東海郡夫人公由國子生為學錄除廣平路照磨掾禮部除拱衛司知事掾中臺中書右司除延福監經歷改太常禮儀院都事陞經歷戶部主事陞員外郎拜監察御史劾臺臣不稱者由中書省右司都事出僉浙西道肅政廉訪使以靜治聞贊僧作橋以利病涉徵為戶部尚書遂參議中書省事除禮部尚書改燕南廉訪使奏仍禮部拜治書侍御史與言事者不合遂歸俄復除禮部尚書擢河東山西道宣尉使拜河南

江北等處行中書省參知政事改集賢侍講學士病不可支矣三子定僧佛留胡養皆夭養姪子亦死病蓋坐是也得年六十五為人恂恂至官事有蘊即發為參議有發倉儲為功者嘗折其人主者怒因斥為禮部其復留也實陰中之謂其虧在公為戶部界域奏令督徵而歲月可考勢不容辨日事榜笞迄詔放始已歷官多績惜狀不見有待他日焉昔人為鄉里掾史稱善人斯可矣及人則未也使鄉里稱善人而致位赫奕又有及人之功焉少游斯下矣天道無親常與善人公善人也而卒無子傷哉兄戲章佩監知事辛弟良僉江西道肅政廉訪司事恪屯田長官陞高郵鹽倉副使娶杜氏繼王氏今夫人劉氏追封若封皆東海郡夫人月日附安陽郭里先塋銘曰

天可必邪鴻濛茫孰往致結不可必邪善淫福禍何待於立善或禍而淫或福又謂其未定之日及其定也善已禍矣定復何益伯道殺子天道亦宜公而無子有知無知豈所謂定者昌其名於不死失於彼而得於此凡重嗣續在先世祀叔也有子先世之祀無止公亦可以無憾矣

碑志十六

故承事郎河東山西道提刑按察司經歷李公墓碑

愚昔玷政府里人李君惟閏實掾西曹愚投劾歸惟閏亦至自西臺以愚稔其世而喜銘善也囑銘大父經歷公之善乃敘而銘之公諱衍字衍父姓李氏上世居臨邑曾祖諱邑三子一徙青一徙徐一為公祖諱信長鬣美風儀養恬鄉里配孟氏周氏考諱成金季山東盜起避地襄城徙穎之虹橋大兵戡定遂率衆降北渡至彰德家焉善廢居致饒益自以生罹兵難靡遑問學誓有子必業儒故伯子壘六歲遣就傅侈費不靳配張氏四子公其仲也幼警悟洵更名師肄習精進國初慮四民貴賤無別而郡邑誅求或苛於士也立格試藝中者復之公年十三從兄試經童遂占儒籍尋

至正身表卷之十一
以冒復者衆覆試真定公兄弟復入高等左丞張公仲謙宣撫大名辟致幕下簡牘往往出其意表轉山東按察書吏憲使陳公慶夫數薦之講經議政與之竟日七年三易使禮遇如一除將仕郎燕南按察知事入掾御史臺陞承事郎河東經歷未行至元十八年四月日卒於京師年四十有七祔安陽輔巖鎮西城原先塋兄壑仕覃懷為許文正公所與終承務郎陝西行省都事弟曰衛曰衍配陳氏趙氏子男二曰舉以子惟閏貴贈奉議大夫太常禮儀院判官驍騎尉安陽縣子曰寶皆陳氏出女一適恩州儒學教授王三省趙氏出也孫男三曰知善克世其業次則惟閏也起家職校歷掾部院中書除通政院都事改中書省架閣管勾拜西臺監察御史陞都事擢僉都水庸田司事官朝散大夫曰諒女五長適劉思義餘皆士族曾孫男二曰某曰林女四長適路無頗餘未

行公性孝在官聞親疾即棄歸名公卿未嘗吏之疑以決乘以和涵剛翼柔故能獲于上而不忘乎下也綴述以發其蘊詩尤膾炙人口愚觀吾鄉故家隆替李氏足徵焉良才世不乏顧父兄之教何如公之父逃生鋒鏑力教子儒卒致顯榮雖天棍其遠未盡厥施然淵蓄之發後先有時惟閏歷言官贊大臬僉水部積階四品實益騰秩益峻昔之人淑其子又及其曾也廢居以裕一時儒業以亢後世其效不既章章乎恃其厚貲納于於邪不易世而丐於市者可不知所擇哉銘曰

時乃否泰地有險夷伊志之持孰地孰時弛擔披荆息肩無幾滄海橫流曷云能止嗷嗷鴻鴈既奠攸居乃厚我生乃鳩我書我書靡及有子即我獲報之捷猶券執左三冬用足于于棘闈伯也頡頏英聲駢蜚韞匱莫藏禮羅尋致友皆忘年官無挾貴牙緋甫及

宅窳處從惟取之約乃遺之豐有美孝孫籍其其譽金紫取榮淵
冰方懼積善者人福善者天其獲惟後其難則先刻名樂石匪詭
而教嗟尔雲仍是則是效

故嘉議大夫東昌路總管兼本路諸軍與魯總管內勸農事
邢公墓志銘

公諱溫字孟直姓邢氏彰德安陽人世居交口里山有鹿崖因自
號焉曾祖諱植贈亞中大夫彰德路總管輕車都尉追封河間郡
侯配李氏河間郡夫人祖諱德裕承事郎藁城縣尹贈嘉議大夫
工部尚書上輕車都尉河間郡侯配王氏河間郡夫人繼郭氏封
河間郡太夫人考諱秉仁歷顯仕疏封二代致仕禮部尚書追封
河間郡侯諡安惠配蕭紀榮俱封河間郡夫人公性剛介不屑州
里入京師從中書斷事府長以其法得專辟者假途焉出官從事

即仍本府知事辟左司掾除戶部主事遷檢校官檢校六部稽
繆非健者不授拜監察御史尋改戶部員外郎轉左司都事吏部
郎中左司員外郎陞郎中史戶主銓總會計而括於左司悉以能
稱擢大名路總管兼府尹諸軍與魯管內勸農事甫三月改河間
等路都轉運鹽使課登而歸天歷初起為冀甯路總管兵後歲大
旱殫力拯撫甘澍屢降歲以熟管州盜連無辜辦於制使釋者三
十二人移袁州未行改都漕運使積有羨而漕無滯遂以疾辭繼
有東昌總管之命年迫休致不起官九轉至嘉議大夫遂堅閉不
復出獨日與里翁奕他無所嗜也至正五年八月四日終於正寢
壽七十有五九月五日乙酉祔於置度里禮部公之塋先世有塋
交口至禮部始塋於是配蕭氏封河間郡夫人先卒弟簡今奉訓
大夫陳州知州起家世賞公之讓也子一人允文娶單氏女一人

未行姪女一適昭文館大學士韓公子嘉興路判官軌公有堂名善樂嘗囑有壬記焉人生安於所遇無適非樂反是萬鍾千駟不樂也飢寒不能謀旦夕而吾廩有餘粟一命可以行其志而吾位致崇顯反而思之凡蒂芥於胸次者可冰釋矣公席世業以裕其生致通貴以發其蘊得於天亦豐矣就令得復過是其樂未必及是也以樂名堂顧不有見於是乎年六十舉子又畢其娶又瞑目地下之大者也銘曰

有厚其生復駛其馳孰拂所為孰搯所施辨幕無撓典郡惟良于醴于委靡效弗章符竹何加桑榆云迫容膝有堂忘形有奕伊果孔碩其實惟一俯仰百歲能事斯畢交口之瑩乃曾乃祖域茲置度實始禮部宰木公植溘焉茲祔一支百斯既安且固

故集賢直學士兼國子祭酒郭公墓志銘

有壬索居鄉里求友惟切昔在中臺中執法同年馬伯庸稱安陽郭公之賢不絕口蓋伯庸居光山公嘗主簿其縣予雖鄉人奔走四方乃不一識至正癸未夏公自淮西歸稻田里第惠然過予洎阡徵伯庸之言益信遂內交焉予亦時至稻田蔭喬木登崇臺談譙樂甚尋赴國子祭酒未幾即引年歸徙居於城過從益數乙酉夏大病方起乘車如稻田予謂氣體未盡復忘車馬馳簡止之公自度無虞竟去病果復作幾殆既愈入城又病痢遂不起予捧奉狀請銘予其可辭吾鄉巨室不乏濡而教授至三世者無有也大父諱文禮金鄉貢進士滎陽平章安公兄弟皆其徒也以公貴贈亞中大夫彰德路總管輕車都尉汾陽郡侯配魏氏追封汾陽郡夫人父諱維栢承家學教授鄉里後學以儒名者多出其門試儒中選復其家因得占籍太廟為禮樂戶贈嘉議大夫秘書卿上輕

車都尉汾陽郡侯配宋氏汾陽郡夫人公諱思恭字子敬甫冠已為里社師聞成均作人負笈趨焉故事陪堂生輸錢乃食祭酒即律公閔公貧苦免其輸補伴讀及格乃教徒於京其徒有以儒至達官者為汝甯教授六年教育有成除光山縣主簿有惠政丁太夫人憂服除移汝陽主簿辟掾河南行省調晉甯錄事刺繁有聲既代郡人請主晉山書院遷猗氏縣尹民有爭田久不決者至即決之訟由是簡興學勸農有古良吏風召為國子助教學官素號難為公凡為四月講課誨導諸生安焉陞博士拜監察御史出僉燕南河南兩道廉訪司事歷雲南漢中淮西三道副使務持大體吏畏而民安之在淮西歲餘即歸中途有集賢直學士兼國子祭酒之召在師席三月諸生方仰以大其成而請老疏出不可留矣既歸葺先廬治城居構亭曰斯可以娛暮年稻田有世塋樹築

克拓不自知其遠祔也壽七十有二卒以七月二十三日塋以九月二十六日丙午配王氏累封太原郡夫人先公卒子二長曰鞏以廕在選籍次皞也女七五有家二未笄公歷官十四轉積階正議大夫六在風紀得行道焉惟大司成之職彤伯荀卿而下可考也唐以宰相兼判重可知已我朝許文正公始正一位元長之席師嚴而道尊厥後掄擢每難其人予在政府衆議嘗及公而不果乃卒為之儒而至為祭酒師席之隆無以復加而又考終鄉里在公無憾矣余識公纔二年契闊居半城居方密邇遽又永別倡而孰予和也言而孰予聽也嗚呼昔哉銘曰

三世縫掖恆業佔畢淑人孔多善慶斯積澤流有源子孫其逢種學而稔濟道而克世有淺夫苟縮一綬棄其素業若視芻狗仕優則學克踐斯言不刑而教朱墨自研持憲作威患狃於隨我不介

仇介盍我師幼為諸生鼓篋于老正舉比五百其徒法容休致人貴知止鄭穆精強留亦行矣山林市廛或往或來有倡必酬有酒必陪田娛里嬉方幸得朋若堂之封乃遽子銘既貴而壽獲正邱首藏石播辭借是悠久

故中奉大夫侍御史慕公墓志銘

至正乙酉九月十日中奉大夫侍御史衛郡慕公終於家子濟州知州瓚馳俾奉行實請銘有壬昔與公同官春坊承乏參議中書省事公入左司郎中銘其宜為公諱完字完夫世居新鄉徙於衛五世祖統宋丹州宜川令曾祖諱億祖諱攄累贈嘉議大夫禮部尚書上輕車都尉追封燉煌郡侯考諱津累贈集賢侍講學士中奉大夫護軍衛郡公妣賈氏蔣氏俱衛郡夫人公年十三而孤貧不能卒儒業習法家即有聲由府憲史掾禮部中臺若中書右司

除大都留守司都事改戶部主事以習爰書移刑部凡三年調江西省都事未行改山東道廉訪司經歷言衛士馳驅馬宜聚樞以絕散居之擾鄉民德焉故事中書掾出官從六品 仁皇痛懲吏弊終考降者二等至從七品止俄以愚哲同滯俾得展陞公始拘於例止官從事郎至是拜監察御史即起授奉議大夫轉左司都事僉燕南道廉訪司事盜馬牛者改用重典錄其犯在命未下以前者仍以故典決之獲生者數十人入為中丞御史臺都事擢淮西道廉訪副使蘄黃囚有造偽幣及奪人木者屢赦疑而不釋讖而俱釋之合肥有殺人而縱之者執而正其罪移燕南副使在淮西言盜馬牛法重刑部議久不決公為侍郎始用大德輕典遷右司郎中又出為山東副使刮弊惠窮興學督醫抑良為娼者四十七家皆發而良之厯左司郎中參議中書省事江南行臺治書侍

御史刑部尚書燕南廉訪使有錦衣之賜有司翫習以法繩之得
官幣汨沒者萬餘定土風市物不鬻擲錢擊賭盜訟以熾悉禁絕
之拜治書侍御史特命陞侍御史公自陳例限從七展陞三品亦
已幸矣而又冒陞二品是倖門由完啟也不允尋以父母殯淺土
請歸致墓久始得請賜中統楮幣一萬五千緡甫襄事遣使賜上
尊召復職力請休致給半俸終其身壽七十有七娶賈繼李皆衛
郡夫人子四人瑾瑜蚤卒瓚以國子員為太祝復以蔭至今官皆
李出一幼未名女三人長適留守司經歷伯顏次適尚恪次適行
臺御史孟撝孫一人文奴以某日祔新鄉岡上原先瑩公早孤能
自樹立以亢厥宗推封二代雖先世流澤有自亦公之恪持厥身
靖共爾位有以致之也愚讀公行實見其所列限吏顛末甚備而
因有感焉古之仕者上為公卿大夫下為下士為鄉師里胥未有

不出於學者周官曰學古入官議事以制政乃不迷學以為政道
本一致歧而二之未見其能政也秦昭用刀筆吏儒之與吏始判
然為兩途劉氏襲餘習而大臣蕭曹輩率以是起家馴至建元故
有刻木不對之語厥後封畛益分而治益以陋我朝至元間大修
文治雖一時名儒用無孑遺然天下之大簿書期會之繁因仍金
舊悉以付吏任之既久趨之者日益衆紛紛弊端於焉呈露仁皇
抑之也其有激之哉且儒之與吏幼而誦習也同出儒師特所取
有多寡之不同爾得山林之一木江河之杯杓已適於小用矣既
乃仇之何也愚與公遊最久得其人為最詳不惟不仇而又有樂
於吾徒焉可不銘也夫銘曰

惟古為學匪半其至已修而治業精而試猶水有源防且無決抒
而灌溉咸被其澤又如構室羣材必儲大棗小桷遇用即輸羸秦

滅經矣劉因陋惠文彈治三尺是究康莊共由封畛遽分吁嗟額
蒙孰拯溺焚我武既偃文物蝟興彬彬諸儒適際休明繼者迹熄
遂淪于習乃於吾士瞠若仇敵亦惟吾士罔克自知不知學之宜
其腐之不惟腐之又詆而侮之然質之美者造詣亦異又何有乎
町畦若吾完夫蓋吏名而儒行殊途而同歸岡上之原永奠幽宅
而有不止者存視此貞刻

至正集卷第五十九終

至正集卷第六十

碑志十七

安伯甯知府墓志銘

至正六年八月十二日丁巳朝列大夫沔陽知府安公卒於家子
承衡致其兄承規之辭以狀來請曰先子辱友公有年矣今不幸
至大故志諸幽以昭示無極者舍公其誰幸哀而賜之銘公於有
壬父執也先公為會福寮屬公實都事有壬居江夏去沔陽甚邇
公之政日有聞銘復奚讓即其狀敘之曰公諱禮字伯甯起家河
南憲史歷掾中書除徵政院檢校覆料官改彰德路經歷入為會
福院都事官文林郎擢戶部司計出為大名路治中陞知沔陽府
蒞官以能稱其在大名沔陽尤為可稱者至順初朝廷慎擇郡邑
官有聲於京者往往外補是以有大名之役元統初詔辟守令臺

至正集卷第六十

碑志十七

二十三

憲交薦是以有沔陽之除大名王卽在焉部曲三千人若居器饒
廩芻粟或給諸官或假諸民規約有方吏不得並緣為姦王嘗欲
擊毬於宣聖廟隙地公進曰此風化所原非戲所也王為止又嘗
以行事得失問公公極言其失王怒公徐曰王問當以正對諛以
陷王不義可乎王悟改容謝之傳尉者有罪遇原朝服出逐公叱
曰汝囚伍也而與命官列乎斥去之別駕程之歿也養子脫因冒
世賞再受命矣嫡孫安童既長乃誣以罪公釋之且歸其廕他如
監輸租則費大省市織段則直先給止導川之妨農息牧地之構
訟皆表表有聞此大名之政也沔地卑濕民重網罟而輕蠶桑公
程有司教以樹養之法且諭之曰一時之勞官若強女無窮之利
官能奪女乎期年有成民今德之新廟學作祭器廣生徒置書籍
得學租隱者州若縣為石二千五百有奇河南行省樞公經理德

安七田軍民之訟遂決朝廷遣使分道決囚公承命分江西以平
允稱此沔陽之政也二郡皆紀之石公平生嫉惡太過故所至與
物忤雖怨之者不免一二而公論的然以公為是者林林焉晚年
以霜溪自命夷猶鄉里種花蔣果手題其軒曰歸興曰涉趣志可
見矣得年六十有七塋汲縣觀頭原從先塋也上世居滄州樂陵
考始占籍於衛祖考諱實徙塋焉考諱國平贈中順大夫同僉太
常禮儀院事上輕車都尉追封武威郡伯妣許氏贈武威郡
君配王氏封武威郡君子男六承規其長也承矩早卒承權刑部
令史承衡承度承量女二長適梁桂次未行孫男三恂忱愷女二
銘曰

嗚呼伯甯自古皆有死公豈獨斬其生胡晝而晦胡夜而明晦明
相禪胡虧胡成世固有久生而無益又孰若速朽而有名伊公英

英通匪厥聲聞於沔水張于元城城復于隍無損公之剛水潤于陸無陸公之肅維彼黃堂維此泮宮豐碑峩峩于以載功晚歲歸休左右圖史以耕以學貽厥孫子收英儼華韜光沈馨矢于霜溪永保堅貞淒其長往嗚呼伯甯吾不知死生之相承吾知吾銘

黃巖知州梁君墓志銘

余居鄂聞岳巴陵尹梁公彥升有善政且知為同里人予游湘中君為船戶提舉始識之粹然古君子也既而請銘其大父按察公碑倥偬未遑越四年始克銘又三年為至正丙戌公歸自黃巖一再見九月二十九日卒於家以十月二十六日祔安陽郭村先塋姪友直孫楚來請銘嗚呼銘其祖石猶未樹又銘其孫弗忍也然悉其世孰其賢鄉人莫予若也安得而弗銘公諱遷相人也考諱莊妣郭氏大父諱貞終朝列大夫山南湖北道提刑按察副使妣

張氏曾大父諱璧妣史氏君以祖官廕望江縣主簿移英山改葺鄉州稅課提領隍巴陵縣尹天臨路船戶提舉黃巖州知州兼勸農事官自進義副尉四轉至奉訓大夫為令若守為政若可紀者焉其佐邑也大旱致禱而澍雨應訟部使者檄讞獄而寃致平其作邑也弭劇盜平金賦終更民弗忍其去其作郡也修學校均鹽課足倉儲民方詠歌其惠而公浩然引年去矣年甫六十有七配楊氏繼張氏贈恭人子男一溟先卒女五俱適名族孫男四楚麓餘未名公有兄曰達達有子曰友直友聞公之考既卒按察公尚無恙治命曰遷其後我再傳則歸達之子公歸即以廕歸友直而不私其孫可謂善繼志矣公喜讀書寡言笑鄉里稱善人為政綽有祖風而又有二異焉世有年逾七十而匿年冒進者公力辭於未及之年一異焉世有不幸卒官而道路阻修遂不得葬公引年

歸躬具棺槨若預知之者二異也不可以不書銘曰
惟按察公孫彥升治民家譜善繼承蹟著淮甸彰巴陵黃巖惠愛
尤可稱世今民帥未足憑剛者猛鷲劇虎鷹柔復脂韋罷弗勝不
練不競政乃恆我銘爾祖惟其能我銘彥升惟其繩繩武有要先
兢兢侵晨餐藥夕飲冰繼世守之世以興

大元贈奉直大夫大同路應州知州飛騎尉追封大同縣男

傅公墓碣銘

公姓傅氏諱仁義世居代郡祖諱琪金兵馬大元帥父諱德貞祐
兵亂徙雲中大同縣占籍禁軍娶刁氏二子長良臣次即公也良
臣三子二孫子逸其名孫蠻子下津閭公娶張氏五子斌瑞璉瑄
琦斌為河東考牧官娶師二子克誠克復三女適崔李楊瑞娶張
一女適王璉有幹局起家奉常知印除將仕郎大盈倉副廳郵城

縣丞武州判官南倉監支納富甯同提舉陞奉直大夫兩淮都轉
運鹽使司判官課登有金緞之賜初娶李追封大同縣君子赫哥
女適今參議中書省事李述彥古封隴西郡夫人繼潘若齋生子
皆幼卒田一子克昌瑄娶劉子克強琦娶郭子克柔曾孫男曰元
曰亨曰貞曰禮曰智曰信曰敬女四人公性稟端莊涉獵書史不
與物忤雖匱乏不妄干人惟力田以自給以子貴贈奉直大夫大
同路應州知州飛騎尉追封大同縣男張氏累封大同縣君祔焉
判官剛直而敬慎離司貨利淵藪少不慎若衣素縞行塗炭鮮有
不涅者富甯民凋瘵積弊非一日宿額酬入歲必取盈乃能潔其
身而不涅登其額而至盈可不謂能乎人謂應州之教有素也既
休致首拓北城襲石儀凡可以奉其先而合於禮者舉為之介其
壻彥古請銘其墓道之石予昔過居庸並塞西北山川風土可得

而稽焉惟代自昔著稱至漢地尤居重雲中氣習大率近似慷慨
豪傑之士實生其間婚姻墓祭之禮兼南北之宜而揚其親於不
泯質諸禮而不悖者傳氏有焉自其先兆域石刻班班可考豈獨
示法奕世而一鄉之化於一家者由是可徵矣應州力田自給以
義教其子判官敬慎自持以禮顯其親是銘之刻三善具焉使雲
中之人知立教之要以勞不以逸一也知教子之道以義不以利
二也知顯親之實以禮不以俗三也風移俗易顧不在茲乎編修
官拜特穆爾既志應州之墓余因有考而敘其世又系之以銘曰
惟代山川據雄峻介子之裔世登俊金火一熄無留燼吾土吾身
不容殉雲中乃徂勞不償椒聊繁衍墜復振祖風獵獵流諸亂謹
正於官著忠蓋疏封及親秩有邵載龔樂石欲傳信碑翁世有無
窮聞平生所植德惟慎善源吾啟後其濬于嗟汨汨流無盡

故元處士徐君墓志銘

承事郎湖南道宣尉使司都元帥府都事黃常仲綱狀其舅氏處
士徐君行實請銘於予予讀之竟壯其辭自足為銘奚復予請辭
不獲則本其狀而筆之曰徐氏世有聞人至鉉之孫祖禹刺饒愛
樂平永豐里風土家焉厥後簪紱蟬聯君諱舜臣字熙載曾大父
文蔚大父體仁皆潛德曠寮父一龍博學能文尤深於易宋末舉
進士而谷陵變遷矣國初薦遺逸擢將仕郎甯國路旌德縣尹敦
迫視事未期月以事親歸累徵不就卒於家娶王氏二子君次也
髫齡如成人復敏甚侍郎談公應斗僉判詹公載采連騎過旌
德試君書義援筆立就詞采可觀二公大異之年十五失父又四
年失母從兄居喪克合於禮屬時艱虞雖未卒業而應酬事物洞
乎有見渙乎無滯演析名理聽者忘倦既長益自樹立里有為不

義者必顯責之雖熟惡亦畏戢其或見絕於君即衆不齒有過者
每自恐曰徐君得無知之乎扶義壘蓄無間疏賤邑有武斷吏不
敢詰它日一守至將繩之武斷煽其黨賂行部文致其罪守素清
慎君慨然偕百餘人詣行臺言狀氣直詞激一府感動守賴以白
與守無素也守來謝君曰我為義不為守避不與見然善善急而
惡惡亦不緩負才不少自下故所至多落落年五十屏跡不復出
鑿井種竹治具娛客客去則琴書自適視軒冕漠如也一日顧諸
子曰吾以明日晡逝矣有遺言可書於簡凡十餘則大要訓以孝
謹俾不辱其先及期果如所言家人環泣復張目曰毋亂我言訖
而絕 年 月 日也享年 莖 娶許氏故宋提幹大琮
之孫京諭志德之女長沙通守李公睦之外孫也其歸也舅姑已
卒歲時有事哀誠如逮事者處士好客傾匱橐相治不靳卒祔處

士墓三子希旦希爽璉二女適方崇文陶泰璉洎陶女他姬出孫
男五澤潤清澄挺女三昔王烈以義行稱鄉里有盜牛者至謂刑
戮是甘願不使王彥方知予常恐後世不復有如此人者今處士
其庶幾乎身雖不仕見之行事仕所不及與守無素能直其枉雖
古豪傑茂如也使劾一職於所當為有不為者乎世有受人之寄
於所當為而恕不肯為視處士獨不愧乎仲綱至順庚午進士仕
而益昌於學力於為善蓋有舅氏之風焉銘曰

惟士為士拔乎齊民或出或處歸善則均云胡鄒書處乃橫議况
盜虛名遂薄於世特立有人剖破封畛不事詭遇不為充隱我無
橫議我不盜名惟義所在我其力行蛇蝎可殺芝蘭可植苟適其
便孰忍不力謂非我職實善之賊積德後大振振繩繩况得陽元
蔚乎才名太史秉筆覈善而書千載而下知有樂平之徐

大興國寺碑

浮屠氏之教入中國千二百餘年歷代尊信金銅海浸無隙可抵
無堅不泮我元以不殺一天下而慈悲之說默有符契既建都
邑即馳及其居日新月盛金碧煥麗環拱辰極萬姓瞻仰如圍祇
園堯率是宜其徒男僧女尼莫不因佛慈悲廣上德意思致崇極
於以祈徠贊化焉蓬萊坊大興國寺者今住居大師比丘尼監藏
巴所創也寺承制賜今額請記於予按師姓常氏真陽信都人大
父榮有巧思尤善製鞍因近侍字羅進見世祖皇帝上嘉其
精藝命直宿衛從幸上京至黑峪紅寺上謂榮曰山林延袤若此
宜多良木朕已詔有司禁樵採者四面各十里汝可留居歲取材
製鞍獻之上京勅其子自當尺兒瓦帶代直宿衛自當早卒尺兒
瓦帶拜監察御史師自當女也八歲召入宮上憐其幼命皇后子

之性聰慧謹恪善迎順后意日見愛信俾掌鑰司出納年十九后
上仙移事嗣后寵信尤篤年二十四奉旨適近臣笈吉刺歹奩具
之費悉資內帑歷成宗武宗仁宗三朝睿眷益隆齋脫無虛歲笈
吉刺歹仕至資德大夫會福院使然師早慕真如深懼滿盈重惟
聖祖聖后天涵地育恩德罔極涓埃思報舍佛焉依英宗即位懇
請上前始聽出家詔從監藏官帝師受具落髮仍為易法號曰監
藏巴既契夙願遂盡出衣資藏蓄竭力以圖營構闢地鳩功掄材
伐石爰作爰謀屢閱寒暑天厯初賜楮幣中統二萬五千緡且勅
后妃藩邸將相大臣各有所輸得凡十五萬緡平生齋脫若奩篋
諸積舉以資締構之費其費不貲矣經始年 月 日迄工

年 月 日中樹正殿後列法堂重門邃深周廊迴合齋庖
庫庾固不畢備像設有嚴鐘鼓有節師身率徒眾昕講夕誦寓華

封之祝年今八十有六聽聰視明無異常時益謹戒律獨超覺海
滋殖福利六宮敬禮簡在宸心今上皇帝顧念世祖舊人無幾而
師巋然獨存是用錫之嘉名以昭殊渥嗚呼休哉昔無染區區不
忘其本君子有取焉若師者可無述乎余故具列懿行著銘茲碑
且俾嗣其傳者知寺之所以成教之所以大銘曰
我觀世間人具佛性一念之微無量感應念有萬殊善惡何分惟
忠惟孝迺善念根婉婉女師究大秘奧昔聞佛言受思思報列聖
在天澤厚仁深何以報之象教足欽捨身匪吝構宇有赫慧日監
臨臣心無數朝仰白毫夕禮金容願施法雨振我皇風佛力無邊
帝德廣大億載同符爾徒克類爾徒孔多遵是法門梵唄洋洋永
報國恩

至正集卷第六十終

至正集卷第六十一

碑志十八

元故中順大夫同知吉州路總管府事李公神道碑銘并序
公諱克忠字公謹姓李氏麓泉其自號也世居青州曾大父諱松
佩銀符山東東路樂鹽使大父諱植知登州父諱顯四歲孤祖妣
張夫人挈以避難七歲族有為帥者攜之入覲十四能騎射從帥
征淮藝日益進帥器之任以機警擢千夫長歷鄒滕尉河南等路
管民權府招集撫慰薄稅均役民德之始徙滕家焉事張夫人以
孝稱定鄉里義約以篤友助就養吉州過徐徐故治也父老迎而
勞之有感泣者年七十八終於吉州官舍公幼穎悟自知力學業
成入京年甫二十八風紀詞垣交剡騰薦遂掾吏部朝廷遣使安
南責以六事署安南國達魯花赤府知事偕哈兒撒海牙等行至

至正集卷第六十一

碑志十一

三十

元乙亥四月也時江南未平由臨洮渡河源經土蕃涉麗水過莎
車至牂牁逾南詔善鄣金齒水陸萬餘里至其國其人外雖恭而
奉行未決移書責以大義諭以禍福取所貢土物歸土蕃梗逯行
雲南新開道丁丑夏始達上京上親臨問錄所經山川地里人
物風土洎安南日歷國主問答上之賜金符擢奉訓大夫工部郎
中兼計議俾再往使江南已平道廣西差近至即得其要領已卯
三月達上京尋命復往庚辰四月挈其使黎仲佗奉表納款九月
至京師而使事竣矣上嘉賞命為城守之長主者要一見卒不
往僅除奉議大夫同知岳州路總管府事撫字發擿恩威並著命
民藏冰初皆怨咨明年大疫得冰即愈播之詠歌改泰州尹未期
擢中順大夫海北廣東道提刑按察副使二親不能往委貲於弟
俾奉甘旨甫一年聲實大振思親即歸鄒滕民羈滯嶺表者三十

餘人給以食載之歸蓋將終養焉廟堂熟公之能若夫均大名傳
驛之偏拯河間鹽法之弊決山東獄內之滯皆承攝而著績者也
改同知吉州路總管府事慨然曰廬陵詩書人物之府舟便而吾
親可偕此吾祿養時也抵郡寇盜方熾除攘之力居多葺郡學新
大成殿諸生紀之石權府捐館哀毀踰禮奉柩歸滕廬於墓側親
朋勸以母在始歸給從弟克明終其身安南盡出橐金贖歸鄉人
之陷於彼者平生急於行義類此壽五十六卒母朱夫人夢吞天
星生公卒之夕有星隕里門戛然有聲配賈氏封隴西郡太君男
女各一人男希顏蔭南昌縣主簿附省縣治人難其任而剖決如
流科稅先完民有訴兒為豪子踣死者傷有足趾痕詰之曰彼豪
子着履來乎曰然曰着履安得有足趾痕此必自踣而以誣人也
訊之俱服辟行省掾從捕贛賊文檄旁午處之裕如身親行間發

矢命中錄勳賞一等擢袁州路經歷部使者薦其能遷鈔山州判
官署兼捕盜建亭曰簡聽昭盜弭也陞建甯路推官太君年邁不
赴築亭種植優游仰事者十年自號靜山太君服除除松江府判
官驗力定役吏不得舞智歲糧四十萬石痛刮宿弊致期預登省
檄封海舶漳州染癘歸陞奉訓大夫溫台海運副千戶改太常太
樂署令俄以疾卒壽六十有二配張氏女適陳孫男三人稷登泰
定丁卯進士第今監察御史稽蔭永嘉縣尉補江浙省行人穎先
卒女一適孔適稷以 年 月 日遷權府而下塋滕縣村之
原狀其世德請銘諸麗牲之石李氏自鹽使至御史六世矣鹽使
鬱而未啟登州啟而未廓權府廓而未苞至公苞矣而天復斬年
造詣止此有家之隆世固有人事業之大有志之士不能無望於
公也愚謂公之樹立非炳炳較著者乎士生用世雖主乎學苟無

氣以充之所就亦淺近爾持樸被入直三省顧婢子語刺刺不能
休者滔滔也公視萬里如跬步三往返如須臾移安南書及為詩
八十韻皆激烈有氣主者要其一見將市思耶抑求賄耶夫以視
萬里如跬步三往返如須臾之氣而肯枉己以徇人乎故雖五品
貳職亦足以行吾志苟一枉己崇秩華貫能直人乎愚聞有功而
食報未盡者在其子孫御史仕日起食公之未食者審矣繼御史
而逐續者尚有望焉銘曰

仙李擢根有大其植幾世幾年而華而實踽踽攝府邁種惟德故
老之思見於垂白使乎專對豪傑以之南交萬里不測之夷曰三
往返猶庭適達 帝曰女能其俾長郡伊誰列惜乃竊天柄我君
我知我忠我職爾何人斯我爾私覲通守豈卑惟安所遇持節嶺
海飛霜暑路岵岵興思鄉僑偕去奉常承家惕若敬勤官不貴大

貴世有聞十年膝下萬事浮雲清廟禮樂吾可為矣倏焉長往曷
云能止嶄嶄諸孫巍科是投續聞無忝繼志尤恪躬冠莪階是
日升奕世流澤益肆以宏睠茲佳城松栢有光本支百世於乎不
忘

故浙西道宣尉司都事贈嘉議大夫禮部尚書上輕車都尉

南陽郡侯鄧公神道碑銘并序

公諱澤字潤甫姓鄧氏其先世居渤海五世祖諱某仕金為保州
刺史始為蠡吾人 皇元肇造國王木華里既定蠡吾公之祖諱
德以才傑見知國王載與俱歸更其名喝里哥承制為管領河間
深冀蠡民匠達魯花赤以卒父諱天瑞母康氏篤於義方之教故
公幼以孝謹稱於鄉里稍長讀書喜賓客善議論出入兵間習知
兵事每策勵自許慨然有用世之志至元十一年秋王師南伐立

行樞密院衆推公才諳宜在幃幄遂辟為豫省文檄調兵食綜理
密勿大為主將所知而襄樊以南望風俱附矣會朝廷新置使宣
慰黃州等路仍繼公為令史轉提控案牘未幾江南平授將仕郎
黃州錄事酬其勞論者少之而公不以屑意也十七年秋陳桂龍
父子反漳州閩中騷動廷議以公前在軍有能名擢為行中書省
左右司都事佐其軍討平之比還進階承事郎改浙西道宣慰司
都事浙西宋故都民俗奢靡而士習戩與少年惡子乘時縱暴為
奸利者以什伯浮言胥動上下睽睽不相保公白上官悉取置諸
理而於扶危興壞賑乏抑奢所以勞徠安輯之者尤汲汲焉於是
齊民始有蘇息之願矣二十二年宣慰司移治揚州公仍都事積
勞當遷方嚮大用而病於杭遂不起享年三十有九實是歲之九
月二十三日也配張氏生子巨淵早卒次配朱氏生子巨川起家

太子司經知印累遷為江浙行省都事入為太府度支監丞宣徽
資政院判官遷福建都轉運鹽使朱夫人卒服除改江西榷茶都
轉運使國制三品疏封二代公之父贈亞中大夫僉太常禮儀院
事輕車都尉南陽郡侯妣康氏南陽郡夫人公嘉議大夫禮部尚
書上輕車都尉南陽郡侯配張若朱封如其姑公始卒時朱夫人
年二十四巨川甫三歲守節自誓朝廷嘗旌其門年八十有賜幣
至八十三歲以歿巨淵子三人曰恪河間路莫州稅使曰淇曰汾
山東鹽司奏差巨川子五人洙大都留守司令史曰澗國子生卒
曰淮環衛官亦里好溫必闔亦曰泌國子生卒曰涇女二人長適
河東廉訪司知事康塌次適蓀縣主簿陳崇本初公之沒也旅殯
於杭後五十有八年為至正二年七月十有七日始克返塋蠡吾
先塋之次又六年巨川始以國子監丞李君黼之狀請為文刻其

墓碑蓋巨川仕而益貧久而後克信其志也愚交巨川久義不得
辭竊惟我世祖皇帝之定江南也網羅才俊盡屈羣策以成混一
之業小大不遺文武並用規模宏遠矣然當是時元勳碩臣既皆
功在彛常世胄芽土至於羈勒之勞尺寸之效依來風雲致位通
顯者比肩皆是也惟南陽公結髮從軍參預籌策再平寇暴綏靖
南土使天假之年積累盛大其奇謀偉績必章章然有可稱者顧
位不售能身殞名沒可悲矣夫雖然吾聞蓄德晦善其施必達巨
川踐駁中外聲名蔚然由其子之所立而後公之所以積慶自躬
者庶幾乎可睹也國家推思泉壤侈以通侯之貴生也弗食沒而
彌章然則刻銘牲石以示永久其誰曰不宜為之銘曰

惟鄧侯潤父蠡吾之英學書學劍久知名我師大介欵以興下馬
草檄如流星策勳儋爵得若鷺南藩寇虐削屢平國有新舊典重

輕吳兒作姦吾是懲上官搽割大輶經幕中畫諾實發劄一朝使
節移廣陵署雖易地秩乃仍人期步武將青冥拾級甫七隕厥登
三十有九丁頽齡令子克似業以宏起家斗食至專城南陽啟祚
世有承宜爾孫子方繩繩于躬不耀歿則榮惟畜不施抒也亨終
古有考在茲銘

故奉政大夫淮西北道肅政廉訪使普顏公卒十一年至正龍集丁亥子中

書上輕車都尉追封恆山郡公謚正肅普顏公神道碑銘
并序

淮西北道肅政廉訪使普顏公卒十一年至正龍集丁亥子中
書檢校官神保列行實請易名制贈嘉議大夫禮部尚書上輕車
都尉追封恆山郡公謚正肅神保拜監察御史以愚同官中臺諫
銘諸阡乃序而銘之公諱普顏字君卿衛兀氏世家高昌曾大父

諱撒里阿塔贈集賢侍講學士中奉大夫護軍追封恆山郡公謚
孝懿大父諱普顏脫忽憐從太祖西征沒於軍贈資善大夫中書
左丞上護軍追封恆山郡公謚靖忠祖妣燕按迷失追封恆山郡
夫人父愛全受知憲宗莊聖太后尤禮之始命徙居鎮陽蓋太后
湯沐邑也贈榮祿大夫司徒柱國追封趙國公謚文靖公幼敏達
事北安王奏請悉屬之起家贛州路石城縣達魯花赤王封邑也
時寇蔡五九張甚發民與戍卒扼其衝復石橋為賊所撤者大疫
躬督醫藥厲氣為息新公宇社稷廟學部使者薦五事備五年始
代人不忍其去拜仁宗潛邸一見器之補東宮必闈赤典環衛文
籍既正大寶詔御史臺除公御史繩糾無所避徂爾堅元帥亦刺
思等受賕承詔往鞫正其罪正旦糾朝儀有二品立一品班首斥
使退不從劾罷之 上行幸次大口問宰臣御史七品普顏散官

正八何也對曰初仕當爾乃特授承事郎擢僉河北河南道肅政廉訪司事陞辭賜魚藍觀音像靈壁囚李殺劉繫獄獄卒噉誣其兄指授文致之讞得其實釋其兄黜汚吏四百人舉才俊皆知名移湖西道平江民岳武斷吏不能制論以法佛者白雲宗蠹浙尤劇上其事朝廷為奪印罷之運使李英恃鹽法貪虐發其贓部使者謀公詣行臺行臺復屬公走中臺上已行幸又馳至上京事聞上深嘉賞酌酒親賜且命上方賜食勅臺臣中書擇能吏與本道稟問罪人得而湖人甦矣改燕南道黜牧守之不才者英宗辛定興五臺皆以行部進見賜賚優渥衛士不敢肆暴上有命公力奉馬陞河南道副使民熟公皆延頸以望信陽囚王蠻兒輩本農家傭嘗往來邵良甫家邵值盜主者疑蠻兒輩瘐死且二人察其狀釋之俄得真盜光州改奉元路總管蓋罷吏騰謗聽者不察

因以劇郡中公期年化行以疾去移守吉安大旱民食蕨本且盡至有牽妻子水死者蓋公自作縣迄守二郡皆際大飢或勸分軍民或力請於上或鬻爵募民身所不及分官往賑急甚水火為粥以食不能自食築室以居無所於歸極揀荒之策誠之所至禱雨輒應奉元黍稷穗生稿節間前後全活不知其幾縣若二郡皆紀之碑召入遷奉政大夫淮西北道肅政廉訪使俄致仕歸後至元丁丑八月三日卒於正寢九日塋真定東陽村先塋兄宗統怯解都魯迷失仲凡昌國州達魯花赤小雲石弟奎章閣大學士趙國文穆公忽都魯篤爾彌實娶衛兀氏封恆山郡夫人生子黃頭蔭承務郎同知諸暨州事再娶吳兒生神保國子生釋褐厯贊憲幕有聲由御史僉浙東海右道肅政廉訪司事女二人長適江南行臺治書侍御史本涯實理次適江南行臺監察御史野仙脫因

孫男三人女三人皆幼公起家藩邸試縣小割游及有餘地文穆
精衛兀書位極清華上嘗閔公職不逮弟公矢辭誠恪益結主
知要職華貫汨汨然來矣仕有崇庠然見諸事業者崇庠不與焉
持憲為賢使者作郡稱良二千石始終一致完節退歸所就豈淺
淺者哉自奉寡薄祿入賓祭之餘買田宅以處兄弟宗戚皆可銘
者也銘曰

高昌釐土育才孔殷旁行專落實肇我文天造動闢用宏茲賁季
也操觚譯潤芸閣叔也崎嶇牛刀甫割天眷一顧順流注壑矯矯
持斧我豈人仇縱其蠹螫力固有限惟枉斯直惟當斯劉兩守大
郡厄丁其會號飢顛連形鵠色菜我不爾急是我爾創一道澄清
浩然賦歸左圖右書雍容燕娛子孫誥誥兄弟怡怡七十有五壽
斯謂得疏封惟崇易名有赫究其邁種猶稼而穡鎮土厚良蛇壇

于恆縵以滹沱中為佳城我銘不泐百世是徵

碑志十九

故奉議大夫同知廣平路總管府事致仕羅公墓碑

愚昔班太史中書知管差除掾羅吉請銘考廣平公碑時應制方殷不果作至正戊子吉赴河南江北等處行中書省檢校官道相迹其實請益恪愚早知廣平公復睹吉之能子也其又何辭遂次其語曰羅氏上世名數繫歸德遷東平再遷鉅野曰忠娶張氏二子長士廉馴行聞於里年二十二卒以子貴贈奉議大夫同知東平路總管府事驍騎尉須城縣子配薛氏封須城縣君實生廣平公次士賢陽穀監當官配韓氏生文郁廣平公諱文煥字顯卿未晬失怙恃祖父鞠之資稟犖犖異常兒人薄其孤奮勵自懲依母族委已於學游東平郡庠會使者閱弟子員見解經融貫欲挈入

京以未得祖命辭明年走謁使者乃掌環衛大官也聞其名於上
補環衛掾使者使西域征宋皆從歷天官征東行省及格除膠州
判官甫至廟圯毀倡衆新之有疑獄久不決司憲屬公果得情懷
孟供億宗藩胥輩並緣假不歸賈不酬公為錄事作甲乙帳去券
刮白着之弊行用庫胥歲率徧擾應者必破產擇精識楮幣者十
餘家以次應求輸稅於衛糶糧百費一主辨於己庾人不敢溢收
歸有具獄盜金珠十餘人讞而疑之俄得真盜盡釋誣者小兒啼
父母以公名怖之兒啼為止終更民立去思遺愛二碑陞順德路
經歷擢山西江北道肅政廉訪司經歷簿領悉就繩尺目盲棄官
愛順德風土家焉改益都路經歷拜江西行臺監察御史皆不能
赴屏居十八年日復明起為吳橋尹塑先聖充鄒二公十哲繪兩
廡像獎學中教里愉戶懌縣西瀕御河歲潦嗇隄為堅築百餘里

人今賴之惡子私標榜樹朋梗治罪其尤餘悉浼走民為立生祠
改武崗路推官不赴晚更號獨慎老人以奉議大夫同知廣平路
總管府事致仕後至元五年己卯二月二十三日卒於正寢壽八
十有三四月二十一日墓邢臺縣白圭鄉左賈村書案崗之原配
嚴氏追封須城縣君繼張氏孫氏吉以世賞為汶上尉改淮東宣
慰司照磨歷秋官西臺掾除從仕郎武備寺提控案牘兼照磨擢
掾中書秩承事郎為今官嘗捧檄過邢懇欲留養力遣之居關中
忽心悖求歸至邢公始捐館孝誠感觸庶幾黔婁乎大父洎東平
府君俱墓鉅野合蔡里白塔係公以地善滂謀遷未果吉恪遵遺
訓而族人難之新阡但設東平府君名石公竈照焉公幼孤能自
樹立謂天厚之耶問關底僚中尼於目不大厥施謂薄之耶士一
命可行志若倅郡司錄佐幕作邑民不能忘至紀碑立祠豈人力

勉强之所能致者哉况隆以壽復昌以嗣則天之厚之者至矣銘
曰
育材企成惟古其難父訓內迪師力外殫志苟不致猶暴而寒
茲顛木由蘖自樹不根家學不資友助辱其甫童克深厥慮鼓勇
道遠間關海隅一命及身我畜遂摠施爾榜管倡吾詩書化流俗
易若鼓應枹惟懷附治民事孔棘獄枉以信兒啼以寂雙碑嗟我
風雨不泐于郡于憲畫諾資成云胡尼之遽蔽其明十有八年復
浚皆井餘光所照桑榆有炳天恩閔勞紫服被躬壽八十三第祿
是叢于胥白圭泉深土厚以妥其靈以裕其後鉅野之澤實惟胚
渾匪流有沱沂泗一源百爾來耳念茲弗諼

故亞中大夫福州路總管兼管內勸農事李公墓志銘

朝廷重守令之選廣辟舉之路嚴連及之條所以其才也愚長

翰林法當辟一人以僉都水庸田司事李惟閔克尋擢福州路總
管兼管內勸農事請使及門乃至正戊子十二月廿八日卒於正
寢得年六十積階自承直郎六轉至亞中大夫猶子林奉行實請
銘惟閔字仲舒其先臨邑人曾祖考諱成避地震城徙穎之虹橋
再徙彰德家焉配張氏祖考諱衍兩試有司遂占儒籍經承事郎
河東山西道提刑按察司經歷配陳氏張氏考諱舉以公貴贈朝
散大夫秘書少監騎都尉隴西郡伯妣楊氏追封隴西郡君二子
長知善敬勤幹蠱家用益裕次仲舒也宦學資給凡力居多由新
城縣儒學教諭轉柘州學正辟工部令史歷太禧宗禋院掾史中
書右司掾右司主兵刑掾執案牘得議可否會民有饋兄肉而兄
以他疾死者姊婿利妻弟之貲欲並吞之誣肉中有毒官逮弟於
理具獄上仲舒疑之詢得實白都堂送所司信其枉釋者圖形祀

之及格除通政院都事改中書省管勾架閣庫拜陝西行臺監察御史陞本臺都事擢僉都水庸田司事在通政公微行河葦庾補居庸北駟戶具有成績為御史持大體急先務華州獄囚誣承強盜讞而決遣西嶽道士陷民為奴釋而民之吳中山水佳勝水曹治焉未嘗事游娛退食杜門兀坐時乘驛舟視啟閉疏壅塞錢塘之役修捍尤有法居半年以病歸闕齋閣潔宥几陳古書畫若將老焉福州閩海一都會象犀珠珍之所聚宣閩蒞之風紀睨之醜司倚之為牧守者視它郡為尤難朝廷掣以付之知其才有素也天不奪之吾知其不負朝廷矣福之民何其不幸耶愚在政府仲舒實掾曹未嘗吏之也仲舒之賢故自可重况同里開乎其歸自西臺吳中相從歡甚愚今年中臺歸仲舒雖病尚能杖策相遇既而日革遂不起里開舊遊彫謝殆盡愚之悲蓋有甚於福民焉明

年二月二十九日祈安陽陽記原先瑩配賈氏繼張氏皆隴西郡君女一未笄銘曰

嗟嗟仲舒幼能讀祖父之書篋篋假途弗忘其儒不亟不徐六轉而為徹侯大夫令聞孔敷孰邁厥趨維畜有滿維墉有陸拮据卒瘠有嬰復孤其天也吁

故中議大夫同僉通政院事致仕王公墓志銘

公諱溥字亨道世為安陽孟遵里人祖考諱玘贈奉議大夫驍騎尉湯陰縣子妣程氏老氏俱贈湯陰縣君考諱安仁將仕郎淮西宣慰司照磨贈中議大夫禮部侍郎上騎都尉太原郡伯妣馮氏贈太原郡君三子長諱博仕至博平縣尹公仲也從父諱安貞終饒州路治中愚嘗銘其碑從其子今湖廣省郎中忤請也公一子明允纍然衰經泣且請曰從祖考得公銘先子不敢例而先世父

辱公厚先子亦公之厚也不孝忍死執事竊有望焉愚聞而悲之
尚何辭公幼穎敏習時務儒雅緣飾起家山南廉訪司書吏入掾
察院轉吏部令史流弊積久惟貨惟來而貧滯者譽之其守可知
已擢樞密掾陞提控俾總諸曹及格授供膳司丞改大都警巡院
使輦轂民號難治乃以能稱歷太禧宗禋院斷事官知事陞大都
路薊州知州撫民以寬繩吏以嚴歲凶請賑於朝全活者衆除京
畿都漕運判官謹出納明會計上官才之改知湖州路長興州抑
未敦本勸農興學終更歸以中議大夫同僉通政院事致仕國家
優禮致仕者兩沾賜段至正乙丑十一月十八日卒享年七十有
三明年正月癸酉塋安陽司空村先塋娶裴氏封太原郡君明允
廕禮部鑄印局使女一人適柴炭局使張吉公懸車後請封考妣
推廕其子顯命沓至畢事考終可無遺憾矣愚七歸鄉里銘其墓

者凡九人戊子之歸公適告老方喜得友而又為銘人之生世其
可悲也夫或者欲以倨起自足傲睨里閭淺之為丈夫也哉銘曰
吾里足賢有英而耆嗟我來暮及從其遺其遺幾人亦復長往踽
踽予行邈邈予唱得朋又喪甫賀而弔彼蒼胷爽其究孰蕪歸而
考終貴而及親况世其祿恂恂有人夷考其故亦曰多弟惟是懷
人亂我心曲佳城之陽洹水湯湯俾介子孫支百其昌

故正議大夫兵部尚書致仕楊公墓志銘

諸壻楊奎赴厥考尚書公喪且請志其壙以愚親而知公也乃跡
其實而序之公諱煥字文伯漢太尉震之後先世由華州徙躍州
再遷大梁金朔州順義軍節度判官我元贈中奉大夫護軍弘農
郡公諱鼎者高祖也贈昭文館大學士資德大夫上護軍宏農郡
公謚莊孝諱國維者曾祖也贈榮祿大夫司徒柱國謚文懿諱澤

者祖也通奉大夫江浙行省參知政事贈宣忠守正奉德功臣
正奉大夫中書參知政事護軍宏農郡公謚忠肅諱敬直者父也
妣徒單氏封宏農郡夫人實生公至元庚寅以儒家子宿衛春宮
奉隆福太后旨入學肄習釋褐從仕郎陽翟縣尹避祖諱辭改
通事舍人轉太廟署令忠肅公疾棄官侍湯藥者八年管勾河南
行省承發架閣庫厯籍田署令拜南臺監察御史移西臺僉江東
湖北浙東三道廉訪司事忠肅公年高請便養授河南行省員外
郎尋升正郎忠肅公薨廬墓側三年拜監察御史出副閩海道移
湖南又移廣西擢江西權茶都轉運使居官五月年始六十八即
請休致以正議大夫兵部尚書致仕至正九年乙丑六月三日卒
於揚州正寢享年七十有五明年三月某日墓祥符縣魏陵岡伯
俞村先塋配郭氏先公卒繼完顏氏皆封宏農郡夫人五子長圭

奉議大夫知湘潭州郭夫人出次奎次堅完顏夫人出也次莊次
壇女四人適永康簿吳瑞平原簿史輩繁昌尉李構留司掾鄧洙
孫男四人鑄鐸七十三慶壽女二曾孫男一添壽公自為小官知
無不為為無不盡侍儀贊禮成廟嘉賞有衣帽之賜莞庫河南
告飢廟堂不避大臣之怒至得面聖卒如所請籍田請植柳為薪
免代桑棗召見便殿有酒醴金綺之賜為御史南臺糾副僉不法
者四人方面貪暴者一人答逐憲吏之誣罷人官者二人其分司
官亦自劾而去西臺按雲南有臣贓悉置之法中臺言官冗吏弊
民貪財蠹切中時弊狂童馬馬沙為指揮聚惡少樹標榜妄肆管
筮沿其黨四十餘人分臺上京賜楮幣中統五十緡白金五十兩
金龍幣一弓矢刀鞍有差臺檄行水開水門造石堤以泄蔡河夏
秋之潦復舊牐六尊蔡水入圭河增新牐二以達於陳民賴其利

僉憲江東發池州監郡之貪復太平西湖之灌溉撤米石橋之阻
隘移湖北適蜀有警守扼塞鎖瞿塘不殺蜀使以達其怒而有臣
有蹈此幾致狼狽者衆始服公之明龍陽建三皇廟修夫子廟覺
漢陽儒學宮牆百餘丈其不專於政而先於教者乎入閩貪吏麗
法者幾百人胥吏三百人徵賦楮幣銀段皆以千計平反林信天
之寃出安南尉之誣湖南徐萬六飢民為盜吏當之以強力爭得
不死廣西用兵連歲疫癘方作黜貪暴撫彫起平寃抑雨雪大作
民疾用甦推茗歲課未登剔蠹利商未幾告足而歸志浩然矣築
室維揚賓至觴詠終日談朝廷典故先正格言故家源系疊疊有
據初忠肅公之在維揚也愚為轉運使每休沐必省之公有浙東
之行愚以忠肅年高諷之公曰俟到婺將來汴省幕職因奉老人
歸鄉里愚竊不然後果得汴幕至汴踰歲忠肅公始薨嗚呼人之

所欲天必從之况為忠孝者乎然事機之巧鮮有若是者愚嘗舉
似士大夫以為美談而亦論愛日喜懼不可盡望其如公也銘曰
青宮暫御擇罔不欽繫儒家子恂恂其心園之賢闕植之士林由
璞而玉由艸而金是宜達財倍軼恆品釋褐出宰受敢不審家諱
有嫌稱謂斯噤抗辭既慤休命為寢君子過厚器識可覘主以剛
毅濟以柔謙三臺司察六道分廉細民其蘇渠魁則殲權利不苛
議刑不濫天報宜豐存沒無憾嗣來汴公原逢泉檻導而弗陞我
銘介鑒

至正集卷第六十二終

至正集卷第六十三

碑志二十

武昌路武當萬壽崇甯宮碑銘有序

武當均州山先名太和道流謂其峻極秀絕非元武神不足當故更名武當勝國端平甲午兵搖襄漢均民走鄂深以神德不能忘鳴於官行武當祠於鄂為冲霄壇制使孟珙禱於神有齊安之捷易壇為觀蓋復崇甯額也我皇元至元庚寅升武當萬壽崇甯宮地據雄峻鶴山亘其後大江朝其前雲闕局深石磴梯危大殿高堂傑閣危亭長廊縈帶通樓環匝百神胥宇羽流棲息壇墻鼓鐘官館庖廡轆錯布仰觀樓閣玲瓏在五雲中絕頂俯瞰萬間鱗集煙靄蔽虧若洞庭觀波濤目為之眩而山川形勝闡闡盛麗金碧丹雘高下相輝玉京十二樓不得而見之此亦人間之洞天也

至正集卷第六十三

碑志二十

四十五

奉定甲子又改作玉皇閣高凡十二丈深廣相若由甲午迄至正甲申一百一十一年壇而觀觀而宮若葺故若建新幾人幾日幾工幾木而甲申之五月戊午掃於一炬洞真明道冲妙真人住持提點兼領諸宮觀事羅君大震職宮事餘四十年勞瘁已至時當弛擔而彼所謂劫運乃丁其會常情體解氣沮方偕其徒曹大坤等以己貲率衆力任其復而威順王實鎮是邦主贊尤恪重起兩廡甲子樓三十一間以其下內半為雲房歲丁亥三清殿成深廣十尋高九丈加舊制三之一又建元天上帝殿聖像侍從供器靡不備功而又作亭礮石以紀綸綍運機為藏以待禴禳餘凡締構日以就緒矣昔閣之成嘗屬予記亡友元教大宗師閑閑吳公亦屢為言時待罪政府多事因循遂至今日乃己丑八月書來告其撤拾煨燼有成仍命余志夫所謂劫運者猶吾儒所謂數也天地

且有數人力之盛神靈之託有能出天地之外者乎其成其毀有不必究者已元武之祠昉宋真宗我朝至元己巳龜蛇見於高梁河以為元武之祥為築昭應宮於是武當之山若增而高矣是宮之名雖主元帝而巍然南面朝五帝者實主玉皇元帝五帝之一也若夫北方七宿為水之神寓形龜蛇者世歛聞矣主之大者盍邕厥旨玉皇禮家所謂昊天上帝也以形體言謂之天以主宰謂之帝以功用謂之鬼神以妙用謂之神主宰者不離乎功用而能妙用者也日月之運行風雷之鼓舞山川之流峙人物之生息皆功用之著者闔且闔於斯往且來於斯視之而弗見聽之而弗聞則有妙用存焉先王之有天下也以為萬物本乎天故祀帝於郊圓邱以體其形蒼璧以象其色樂九變以著其數猶曰維天其右之其之為言不敢必之辭也不特此也羣祀亦然或求諸陰或求

諸陽不敢方所徵形狀索也自神仙好樓居之說行遂有作崇臺
傑觀以俟之者嵩呼之聞巨跡之見真若可以形聲相接而像設
濫觴於此矣其始也施之羣祀其卒也於上帝亦冠裳而宮室之
矣聖人以神道設教上智昭昭無幽不通下愚蚩蚩既顯而蒙孰
為民彝孰為帝衷可使由之而不能使之知也今號於衆曰帝以
主宰言其不啞然笑者幾希孰與樹中天之華構揭上帝之高居
使瞻而仰之者舉首加額曰上帝臨女無貳爾心由是而舍惡從
善之心油然而生矣是宮之建顯命靈躅祀簷瓦民者固自有在而
使民觀感日遷於善聖教之助不又多矣乎銘曰

岷江東涘鄂城西壁疊巘嶸嶸崇宮仡仡天關失守仄飛瞬息剝
亂碩果復根定力噓蜃倏樓琢璇俄室三華屹岿九光赫奕彫梁
龍矯文瓦鱗集棟吻雄釐闔腰鳴霓疏檣綺結飛簷翠濕碧霞騰
虛流雲洞闢屏翳擁幢豐隆列戟桂漿醜素蕙肴蒸碧靈霜清厲
廣樂翕繹瑶草肥靈玉華酣日紫芝已甲蟠桃行實祥鸞朝朝瑞
麟夕夕元龜左顧靈蛇右翼山川開朗神人愉懌物具阜康世允
甯謚丕冒神休永奠人極

伊尹二程祠碑

嵩古伊川郡隋唐為伊陽縣我元仍金為州至順庚午知州李德
恭即縣舊治西偏建義學因地伊州祠二程夫子後至元庚辰幕
官鄭文曾以祠卑隘又以伊尹之伊蓋原於是謀諸守倅擴一祠
合祀而倅州張宏贊之獨力當縣治中為堂三楹中像伊尹左右
列二程工未迄者歲壬午判官李楨收功焉翰林待制吳炳榜曰
伊尹二程之祠宏請記其故於石夫聖賢廟祀當通祀者人不得
而專也當專祀者人不得而通也通以道言專以地言若夫位不

同時復不同合而祀之亦有說乎道同也地復同也則時與位在
所不論已上古神聖繼天立極道統之垂尚矣堯舜禹湯文武以
君兼師而接道統者也周公位雖隆盛臣也孔孟又位不及周公
至於道統之接則均焉周公而前以道自任者伊尹爾處畎畝之
中樂堯舜之道既而幡然任天下重以斯道覺斯民一旦相湯伐
夏救民任道行道與周公等韓愈氏原道言周公而不及伊尹何
哉不獨伊尹也若皋陶傅召之為臣皆接道統之傳者而皆不及
之蓋歷序往聖冒於其君爾孟子後千四百年而有程夫子出得
不傳之學於遺經辨異端闢邪說使聖人之道煥然復明於世孟
子之後一人而已是雖叔子序伯子之言而叔子之道不異也兩
夫子者有以接乎孟氏之傳所以繼往聖開來學其功又不在伊
尹之下者焉禹稷顏子跡至不同孟子以為同道况伊尹二程道

既同矣地復偶同則合祀一堂禮亦宜哉學者希賢希聖行道而
使天下被其澤守道而使後世有所述孟子曰近聖人之居若此
其甚也是祠不獨崇祀而已焉

有元故中奉大夫陝西諸道行御史臺侍御史宋公墓志銘
至正庚寅九月十七日己巳侍御史宋公堯於滑之里第子訥走
伴致辭曰先公將屬續遺筆曰吾身後當求銘於安陽許公公實
知我慎毋以他人為封有日訥不敢違次敢以狀請昔公嘗介識
者徵文不果為至啟手足猶惓惓於愚愚惟知生者弔知死者傷
弔傷皆致命辭公父子雖不一接而皆知之銘不倍百致命辭乎
公諱崇祿字壽卿其先由衛山陽徙滑白馬縣永甯鄉中東保林
子里先塋在宋胡寨世不可考改卜里西原為永甯阡曾大父諱
殷妣張氏而上皆塋舊塋大父諱德仁累贈嘉議大夫禮部尚書

妣孫氏追封京兆郡夫人始塋新阡父諱宣累贈中奉大夫河南
行省參知政事護軍京兆郡公妣孟氏封京兆郡夫人公甫冠入
京為故相康君國左丞何聰山器重掾中書除同知樂平州事他
境事難決者行省悉屬公復松江豪民曹孟炎瞿陶等匿田租四
萬五千餘石錢三萬餘貫活常州飢民二萬餘戶正饒之貧民代
大姓輸納之苦調處州路推官甫越月決囚數百平反陳明六曾
崇三之冤擢江洲省都事歲旱疫死者大半公檄入閩預收鹽課
勸誘疑者得米三十八萬餘石以賑入為戶部主事升員外郎節
濫賞斥冗食言生財裕國之道搏節金穀以百萬計時議汰冗員
公方自以冗辭中臺奏為都事屬省部事稽滯無算臺奏遣史檢
治柄臣不悅因中傷公既直前枉復職以親老辭擢燕南廉訪副
使有文綺之賜罷監縣之巧斂者一郡守之不法者二出清州民

張仔等四十餘戶之產於僧寺言斷事官之錄囚失宜蒸收之賤
禮傷化時論避之災異封事言尤剴切遷潭州路總管三月決滯
訟九百餘事用刑尤甚若保定黑驢之盜糧父白於吏潭州蔡千
一之殺牛妻出其皮律同自首公皆釋之改都漕運使潭民詣闕
請留者三十餘人拜江南行臺治書侍御史改山南道廉訪使威
令行以親老歸除戶部尚書不起親喪毀瘠踰制作新塋立世德
碑塋宗族貧不舉者十四喪服除除廉使四川復改江西皆以疾
辭畝畝中言時政七事闕陝旱荒起為西臺治書侍御史賜金段
以罷其行言荒政七事進中奉大夫侍御史時方限吏銓衡乏人
請展吏至三品以通滯才未幾力請休致臺臣奏給半俸分給宗
族及凶喪貧乏者年八十五言民瘼十事蓋未嘗愬於世也疏封
及親立石先塋構亭曰介壽日閱載籍事可法者手抄成帙纂東

郡志十六卷紀史奇蹟十五卷出師表附錄二卷公私晏皆不造
婚姻喪葬風雨必往肅賓客終日不倦教子孫以孝廉節儉勤學
睦親未病以所愛杖散親友薨之前二日取家傳歷履手自刪定
付訥疾革櫛髮整衣端坐而逝享年八十有八是年十一月二十
一日壬申祔永甯阡娶張氏追封京兆郡夫人生子謙世賞累官
奉訓大夫上都萬億庫提舉先公卒繼張氏封京兆郡夫人生訥
國子生戊子會試終場臨州儒學正女二人長適邢臺縣尹李熙
能盡婦道次適李甯早寡守節養姑孫男五人孝祖大名府史希
祖領鄉貢南樂教諭彰祖蔭太常禮儀院檢討衍祖鄉貢進士復
祖甫冠女三人一有從餘在室曾孫男女各二皆幼洪範五福一
曰壽言有壽而後能享諸福也有廩祿為富無患難為康甯樂其
道為攸好德順受其正為考終命揆公自丞相掾踐歷中外至第

二品中間退居者十三年懸車後又二十年優游鄉里著述自娛
廩祿終其身壽濱期頤蓋五福之備者也而追榮前人孫曾繩繩
又有出於五福之外者矣銘曰

浩浩昊天仁覆閔下俟于戩穀獨靳弗假翼而兩足角而去齒在
理惟恆亦任厥委盈天地間總總而蠕有賤有殍有天有鮮伊得
其備百萬而一天豈而私天實而德質今有人籍甚東郡根以天
姿濟以學問貳郡佐幕作牧持臬裕財濟飢獄寃以雪白頭缺畝
敢忘帝力知無不言言無不悉効其忠蓋不問仕已乃知在官當
行肯止懸車養恬恂恂鄉里春誦夏絃左圖右史天祚其誠壽幾
其頤鄉為矜式士有質疑有亭翼然人去亭存藏萬卷書遺爾子
孫書固公遺盡求公心我銘不浮公頌爾箴

故處士劉君墓志銘

諸生劉瓚昔從予政府蓋欲蛻齊民而顯其親也俄以親老辭歸其父處士卒拜而泣曰瓚不仕無以顯其親志吾親之善使不泯獨非顯乎且瓚身自執事而後行故敢以凶服請予聞而悲之按鄉貢進士張冕狀處士諱士亨字希賢世居安陽孫平里祖父諱望配李氏父諱成配曰張曰李曰張曰程五子處士出李氏次特聚光祖尚絅處士矻矻力田父母年八十夙興必先省問而後治事未冠任家事衣敝食糲引洹水溉田樹畜以滋歲入視舊倍蓰重然諾慎取與貸人不急徵遇親戚子弟必教以孝弟勤儉年踰耳順始構亭植竹為娛老計密邇城市未嘗輕入孫平四多膏腴視他里直十倍歲時歌舞嬉游習俗好侈處士深自推抑不為所移子弟有衣華服見者駭曰吾家素質何用此伏枕彌日夜者懼棄其衣始與語集賢檄為孝節處士至正庚寅八月十四日卒壽

六十有四娶朱氏先卒繼娶趙氏子四長瓚也次璋瓊璣皆讀書女三適張吳郭孫男三尚幼是年十一月庚申塋孫平里新塋嗚呼世俗欲顯其親者不過以仕孝子仁人之心不在是也修其天爵人爵從之顯在其中矣不量己力遺親遠出徼一命而卒不可得雖或得之而父母之產為之蕩然瓚幡然歸養怡愉以終其天年人道得矣瓚之得此處士之訓有素也銘曰
力足以力事而獨施於田善足以淑人而獨及其子不事不人是為處士編氓蚩蚩何敢與齒矧茲有託處士不死

至正集卷第六十三終

至正集卷第六十四

碑志二十一

先太夫人歸祔志 生乙丑年

太夫人姓高氏世家彰德祖諱朮刺監衛輝路考諱榮承事郎萬甯縣尹太夫人幼淑懿祖妣王夫人愛過其女擇配極慎乃歸先尚書公家故饒田畜而我素貧安若習焉事姑宋夫人以孝聞周睦姻黨舉無間言先公為小官間闕世途實多內助同官家芬華相矜獨罄簪珥延師買書嘗曰吾教子苟成當富彼百倍人但勵志安貧清貨其效應後自見也先公好客究力營給有佳飲食必蓄以待平生不私一錢聞親識有私藏者謂子女曰財出夫子私將焉用此態世多我不能為女曹當戒也子女雖愛教不姑息故女克敬戒子不至辱其先者慈訓有素焉長子有恆治生於外太

夫人總於內先公居家手不釋書迄終身無纖累一妹適集賢直學士狄文忠南北間闕語及輒流涕因為有恆娶其女尤好施予遠近姻族或養於家或資以生里巷病寡猶拯焚溺故舊有喪飲食為廢後有聞率不敢告見人憂患汲汲督諸子營救臧獲小過必揜衣履鎖肩每躬為之諸子止之曰彼亦人也吾以此消日爾其仁厚慈恕蓋出誠性至於女工精敏又諸族所希見有壬為兩臺御史封恭人湯陰縣君左司員外郎進高陽郡君兩淮轉運使加高陽郡太夫人至順二年五月二十六日棄代於揚州壽六十有七嗚呼天乎乃至是乎有壬始官南北雖不在側而改官加封報不間歲尊慈殊慰以為酬昔言矣承乏詹事中議轉左司員外郎右司郎中又移左司皆在側也侍先公終正寢襄事居鄢服除有恆忽去世季有孚入會試而有壬迫赴淮漕叔有儀棄經筵檢

討獨任家事尊意懸百口累不肯出有孚登第歸居家待次乃甚喜有出意即迎至揚有儀從焉有壬召參議中書省事具舟將北太夫人鍾愛幼女擇歸有日臧獲病者十人乃語有壬曰汝妹事吾寤寐在念此則迂矣且病者留之誰託挈之舟隘暑蒸此幸屋大宜夏有儀又善事我汝當扈從上京京師屋難得汝先往求之別不兩月妹事畢病者復計我至京扈從適歸事當兩濟况使來三月不亟行恐叵測時往還諸公亦旦夕從使者聒聒相勉謂堂上起居康勝處事明當而有壬冒榮不孝遂輕信焉去才四十五日而訃音達上京矣嗚呼天乎果至是乎昔南臺同官言親年踰七十無兼丁溺官榮違奉養者可禁指其隣有任江西父病念其子而殞者有壬時同署焉孰謂一旦身當之耶呼天不聞呼地不知知是而懲而卒罹之豈非冒榮之過邁此大罰乎棺槨衣衾雖

有儀能盡美而有壬為子病不得嘗藥終不得視舉尚名為人耶
古人謂勿之有悔如有壬之悔非死不能已也有壬及事祖妣夫
人獲奉考終後二十年父兄繼失荼毒雖極而夙夜堂上身心有
屬今仰而望之無一人在上矣追念配德實四十五年生五子二
女有恒大理軍民總管府知事繩繩天長女適編修官趙彞將同
入京先二十五日卒病其基此乎幼安貞將歸人者後二十四日
卒天禍我家何其酷也孫男二寶山燕山女四明年五月十六日
祔安陽武官原先公之墓初太夫人妣武氏若外祖考諱清外祖
妣石氏皆老吾家萬甯公無子沒海南求其柩歸俱葬江夏治命
當返鄉里謹奉而襄事焉敢述先德且聲不孝之罪傳為子孫戒
焉嗚呼痛哉天地有窮而此恨無窮也

亡兄大理知事公志 公生於乙酉年四月十六日甲寅時

公諱有恒字可久彰德湯陰人曾祖諱信祖諱毅贈亞中大夫彰
德路總管輕車都尉高陽郡侯祖妣宋氏高陽郡夫人考諱熙載
從事郎會福院照磨兼管勾承發架閣庫贈嘉議大夫禮部尚書
上輕車都尉高陽郡侯妣高氏封高陽郡太夫人先公為貧仕祿
入甚微廉淡樂道不知治生公幼從至鄂種學緝文通蒙古書未
冠即奮勵任家事稱貸廢居備水陸艱苦當途薦茂才除大甯路
學正擢大理路軍民總管府知事驛符偕勅至公謂遠出不能為
榮不若治生以為養也由是不復留意於聲名矣先公之喪哀毀
踰禮去大祥二日卒於鄂天曆己巳二月二日也疾革曰我才四
十五數何短耶事母再一二十年不為多也今不得事母矣嗚呼
痛哉先公年甫強仕即得公力遂斷家事每當赴調公輒代行山
川崎嶇旅食蕭索不知也佐湖廣省理幕再至鄂公習風土便薪

米因葺居焉有壬應舉應官奔走無甯歲仰事之重非公不能出也先塋襄事侍太夫人居鄂困庾之積鮭菜之微莫不有備己巳庚午之荒一門老幼賴以無餒公氣和而中剛斟酌世故曲折詳盡儉於自奉而豐於親朋早夜克勤內外秩秩娶李氏先卒一女小茶靜慧絕異繼狄氏集賢直學士文忠女無子先公嘗令養弟有儀子寶山公既卒太夫人遂命後之初有壬登第季有孚方學公曰汝能繼凡當作雙桂堂有孚果登至順庚午上第有壬為兩淮轉運使遂參議中書省事加恩二代皆公之願惜不及見也我彰德公自穎來相積善未享先公太夫人承以碩德乃五子二女公其長也在親左右之日校有壬為多古人生願為兄之意蓋有契焉顧奔走四方廢溫清定省萬鍾千駟果何有哉公之遂此天厚之也然以孝友天至而不終子職使太夫人高年反服又若天

之甚薄者天可問乎使公壽考則一門老幼可坐而無慮吾兄弟放浪四方可無內顧之憂而公之所以成就者可勝言哉公為子而能子齊家而家齊視食焉急人之事者有間矣人之生世不獨官可行志也天降酷罰太夫人奄逝以至順三年五月十六日祔安陽武官原先塋公從焉懼其善之泯也忍痛輟泣而志之蓋至哀不復文也

亡妹趙宜人志 丙申

泰定丁卯二月先公尚書府君諱熙載捐館京師既祔先塋太夫人高氏視諸孤居鄂是歲十二月妹宜人諱巽貞從其良人翰林國史館編修官趙彝自洪州來弔彝官京師宜人疾作不能亟歸有壬為轉運使揚州太夫人篤於愛母子不能離且以有壬室未有繼年高目力不洞妍媸宜人亦謂我濁兄久願擇嫂以報至順

辛未遂俱至揚俄得卜趙門趙居金陵侍太夫人得畢其願焉未幾遭疾五月一日卒於揚州年三十有六有壬暨弟有儀輟哀治事棺槨之美衣食之備傾城府官吏士民哀送儀衛之盛太夫人見之割不可忍之愛而亦為之少釋焉惟許氏為穎著姓大父彰德府君諱毅始徙湯陰清德起家先公仁孝太夫人懿德克生賢女而我祖妣高陽郡夫人宋氏柔靜淳淑貞節著聞宜人及事之起卧與俱故性行尤相類幼不遊戲未笄尊稱衣履皆出其手先公太夫人在撫州更病獨宜人與弟有孚侍勞苦備至迄平復始解帶既歸趙太夫人如失左右手事姑安陽郡太君得惟心其容我也念違養不釋口質簪珥為貲以寄寒暑履物不絕待介婦有禮視前室子誥誥自幼及冠人不知為異出趙族大口衆老臧獲尤難御稱無異辭先公以宜人質美輯女教書授之宜人為婦為

妻為母舉無悖也彞官七品得封宜人令名日起官日大宜人宜均其榮而一旦先逝天之忍乃若是邪一子綿綿實生我家得奇疾太夫人屏絕家事盡瘁保育幸愈而健有壬罪大惡稔太夫人暨幼妹相繼傾逝逾月彞至哭曰相我者不復可得矣太夫人嘗予我我制雖總心不總也同舟至九江以神主暨二子去嗚呼痛哉命果至是邪抑醫藥之誤耶將金陵之行觸新暑疲起居以致疾邪兄不能盡友愛而乃以移禍吾妹邪窮天地亘古今之憾萃於一身矣明年 月 日墓安陽原從其先塋彞請志之嗚呼予尚忍志予妹也夫沈痛隕絕書其概而刻之

亡室高陽郡夫人趙氏志

丙申七月一日生

亡妻趙氏諱定永平樂亭人其先在金累世擢科號進士趙家曰充者登大定二十五年第終盧龍縣尹予震至甯間及第蔚州軍

判軍判之孫兼善個儻不羈日本之役諸兄為省僚慨然從行大風舟敗冒白刃抹兄出掾憲司行省與長官齟齬輒棄去為景州教授而卒嘗曰吾力學為校職使人稱先生是不墜先業志願畢矣介直嗜酒嫉佞若仇故所遇不合娶戴氏生夫人端靜柔懿舉族異之嘗有象過門鄉鄰空屋蔽垣諸女郎僵走邀看夫人才十三竟不一出時大家以詩禮名者聞之為其子求婚先生曰吾與世偃蹇栖獨三女而此女最賢且術者言當郡國封若世雖大若子未可知也其家恚而謝之有壬未婚走四方辟山北憲憲使庸齋劉公有人倫鑑與先生厚一日招飲賀曰府尊屢書為君擇婚君之婚未易擇也今真得矣母慊不告此實府尊意不可失而此婚尤不可失也先生亦忻然曰吾得婿矣况庸齋媒世無有也好言遂合皇慶癸丑五月乃歸於我每以未見舅姑為憾南臺觀

省有日而督召復北夫人至垂泣真意有不可揜者先公太夫人入京始得行婦禮女工復盡巧綴太夫人稱善事焉平居服澣補敝一縑不自用時有賜給悉留以獻先公之喪夫人力疾蒞事送厝所十里不車幾斃焉歲時祭祀寢食必廢主饋未嘗以涓粒私其子視予妹如兄弟廕珥有需傾委不靳與姊如居無間言入吾耳始封恭人當進縣君皆以讓吾祖妣宋夫人夫人素多疾天歷二年九月二十七日卒於鄂年三十有四太夫人如失愛女有壬為服齊衰期焉初先公既棄諸孤幼妹未有家夫人誓言當盡簪珥奉之以養姑志以恤其無父勿使人謂兄不如父也嗚呼斯言丁甯猶在吾耳也夫人孝慈敬勤宜享福祉而壽乃止此邪歸凡十七年未嘗遠相離惟應舉來江南涉十月為最久相從歷九官山川跋涉貧乏辛苦每同焉官任雖劇俸薄食眾夫人衣飾每不

給未嘗少動於心予為轉運使祿入稍優而夫人不及見矣夫人
生失五子一女卒後又失一子余年將半百憂患纏繞夫人有知
以我之心為何如哉一子燕山能讀書矣女順茶姆謹視之繼夫
人趙氏子之如己子夫人可無恨矣至順二年六月進封高陽郡
夫人明年 月 日塋安陽武官原從先塋禮也為之志曰
惟性于貞胡啻以齡兮惟孝于姑乃貽以荼兮其儀可母子弗覩
兮拮据成室不同適兮佳城埋玉夢則髣髴兮目存耳言終不可
諉兮

擬毀壁 己酉

女弟諱安貞生戊申十二月二十九日幼多疾太夫人高氏疲心
殫力調護有成為人寡言笑坐終日不見喜愠食飲美惡早晏自
幼不經口先尚書公訓以女教警悟強記遂通其說又能楷書組

繡裳衣各致其美見諸嫂理家即善握算父兄祿入悉付之出納
無毫髮失慈訓日益性習俱至故女德近備焉生最晚太夫人尤
篤愛至順辛未春在揚州卜擇始諧柔日將屆而趙氏姊卒太夫
人復遽見棄妹素孝敬值此荐凶哭出輒殞時又大疫遂成疾十
日而卒六月二十日也明年五月十六日塋安陽武官原先塋昔
黃太史為女弟賦毀壁因抒其意以極吾哀以志其墓焉

玉在石兮多瑕得維瑜兮成復嘉可聘亨兮禮天弗一試兮胡毀
滌濟美兮世艱女懿兮亦然撫育兮既堅姆傳兮既賢歸之易兮
才違擇之過兮後時嗟嗟父母兮終始難之厥施不爽兮誰復敗
而孝敬有素兮母姊長辭時雖不疫兮亦將自摧侍膳在室兮奩
儀夙備留之益傷兮棄復無地江之水兮東流淮之山兮幽幽旅
鴈嗷嗷兮窮猿啾啾汝來何愉兮汝去何尤洹之水兮先塋相之

土兮先里汝窶有位兮父母孔邇不婦於人兮終女於家是亦汝志兮我徒爾嗟瓊芝月露兮與汝俱潔汝凡泪盡兮哭汝以血

至正集卷第六十四終

至正集卷第六十五

說

蘭庭芳字說

冠而有字字依乎名禮也我朝肇造渾厚真淳之氣粹然古初名且強贅况字乎語隆治首唐虞奉夔稷契有字乎有而不傳乎臆說知其無也然則字之興也其亦淳之漓而文之盛乎

太祖皇帝聞周孔教而基文運

太宗分四隊教子弟而一

文教

世祖立胄館廣學校而盛文治百年來薰陶淪浹氣

習不能不變也名而又字宜哉昔兩承乏御史國人同官者或未字同官必相與加之否則皆若有缺然者文治之漸溥矣乎而夏圃蘭蹊早以通才歷華貫擢湖廣行省正郎行臺監察御史篤列圖敬夫擷其名蘭以氏之推蘭之德曰庭芳以字之徵予說以自

至正集卷第六十五

說

五十九

淑焉卉之嘉而清者為蘭見於百家詳於離騷而又以芳稱入其室久而知其芳者見其蓄也漸之則芳者示其益也不為不服而不芳者守其恒也變而不芳者憂其至是以託興君子之不遭也其曰庭者則謝車騎謂芝蘭玉樹生庭階義焉士君子道德植於身教令行於家而後功業及於天下傳於後世不但一家一時而已也盡吾之誠極吾之力於吾所當為名之聞不聞不恤也况實之所在名固從之則字尊於名矣夫儻人之爵當得為之時而或一毫未盡則字之為飾古人不我誣矣且天地之間義理無窮人之為學造詣有限一藝一善皆足以流芳一時一章一句皆足以資口給語其至則君子病焉庭其近也芳其微也由近而遠由微而著其亦培其根以遂其實乎公羊氏謂名不如字其在吾庭芳矣

洪中南字說

番陽洪紹祖介其鄉人高本齋請曰紹祖之先由樂平徙餘干十
一世矣所居生聚繁盛人名為洪方兵燬大父留畊主簿遭城北
嘗戒曰洪方祖基九轉至我且近先塋慎勿棄也先子西清教授
復徙安仁甫述事而沒惟祖訓不敢墜泰定甲子經葺始完遂歸
焉前池後阜松竹映帶居山之中面山之南因以中南代名願誨
不敏予聞而復之曰古人既名則加以字而字則取義於名聖人
以立名而字從之鯉之為魚同之為淵參而在輿由而在路若稽
載籍戾是者鮮若服祖訓力堂構紹祖名斯稱已而中南何居乎
山中之居因地為之不得已也吾又因而字之字名之實也身之
章也豈好奇務新自同於山而以不同於人為美乎夫不同者山
也同者人也可同而可不同者理之所在也彼遊方之外哆然標

榜吾儒不取焉君世儒力學予重違其請取其中而略其南而後有以告焉夫中主於不偏天理之極至也大如天地小至一室而各有其中君子修身止於至善之地也君其致力於此使處心行己之際無一毫過不及之差或南或北不恤也苟為不然則自西自東自南自北吾不知其稅駕之所矣所謂我知天下之中央燕之北越之南則將合蒙莊惠施之喙且不能喻矣君其思之

彭宗建字說

斗天樞機也屈平欽名字攝提孟陬首言其貞廬陵彭季斗父既名之師劉岳申以宗建字之其有取於斗乎禮子冠父宿戒賓冠三加祝而字之字之則責以成人之道矣師猶賓也父師之道盡矣成人之道則在宗建焉亦致思其義乎斗在天中酌斟元氣平分四時自歟嘗歷元枵杓之所直生長收藏莫有戾者學者象之

龔思永字說

西域生龔大父嘗持憲數道世賞在龔自以年未及學未充也日種學績文非儒生不交紈綺氣習濯刮殆盡予與其外舅和叔監郡遊時從過予俾賦詩每俄頃成且清麗不苟暇日請曰龔幸承下風不有擊其節使服膺以卒其業與不及門承教等耳昆季為華學率以思冠其字先生幸字之予觀世之人習於近而不究其遠狃於短而不求其長天下之通患也若世家子則此疾尤痼薰染性成知飽煖而不知有飢寒知富貴而不知有貧賤目前之利

不知為生後之害一時之樂不知為百年之憂謂金幣可長有也
用之如泥沙謂權勢可長恃也挾之以驕縱年邁家替日暮途遠
輕則飢寒之戚嬰其身重則傾覆之禍及其族雖跬步不能前矣
蓋不知思永之過也書不云乎慎厥身修思永言身雖謹而所思
者不永則亦淺近而已矣故必謹其所修審其所思為遠大悠久
之計則學成而行立矣故從其昆季之以思為字也而以思永字
之敘其概若此俾思而有以自勗焉

丁慎之字說

中書總天下機務惟幄佐史之屬鱗次於其下譬為巨室棟梁柱
石之大勝其任矣根闡居楔之細亦莫不各致其良不以細而易
之也一或非良雖傾覆不職是而損敗之患馴及其大矣國制諸
國之人各有部以總其族衛戍之餘又各入其人於中書中書祿

之秩視行人而又優其年老號王典赤譏門以嚴省署從直以擁
護宰臣備傳遞以宣布政令出官七品階是樹聲名至達官者多
矣予待罪中書分而審直殆徧其徒從予最久者西域札馬魯丁
慎而寡言若詩書漸習之有素者乎得請歸洹阡馳傳過再拜請
曰細人事公之日最多習公之言誘人使為善者非一竊有感焉
世西域而生中國又得親公之教敢不思所以自勵者幸閱而訓
之字得服以自勵則是事公於終身也予素愛其人不宣得乎凡
今華其短裾飛其組乘事上則為便嬖使外則如達貴視齊民如
草芥厖突撐觸謂人莫敢我復者滔滔也乃能斂其鋒銳求所以
自勵者且服役幾年所直幾官而獨有見於吾輩其可進也哉於
是即其人之長字之曰慎之且語之曰若知慎之為義乎立身之
要道乎慎於言而言無過慎於行而行無失無所往而不慎則無

往而不得其志不但官日盛名日著將見日進乎善而為成德之君子矣慎之其益慎之哉

名張碧說

襄垣張生質厚而氣清年甫二十負笈來遊居三年餘人日刮目余將北乃再拜請曰小子侍有日未有以名惟古子命於父禮也民生於三義無二焉幸訓之名生敏者也猶器之利者焉遂以碧名之而以景耜字之且為之說曰士之立身行道齊家治國其本在學農之用時因利裕家富國其要在器故是之取而為生道焉耬鉏鎛鍤皆有用於農而耜也獨見取者誠以發堅破塊俾播種有所施未有先於是者則是耜之器農也不亦重乎使其鈍不勝任將焉用哉詩所謂有略其耜者取其利也人之敏者亦然人矇已見人後已至業修德進乃亦有秋矣然而耜之利不用則無功

性之敏不勤則無成悠悠歲月一暴十寒特已易能舉為不足學望而未見且謂己能猶惰農不昏作勞舍利耜而不用雖利何以哉故聖人謂孔文子所以為文者以其敏而能好學也况前輩言後生才性過人者不足畏惟讀書尋思推究者為可畏爾碧也不患其不學而患其弗思也不患其不行而患其或止也碧乎勉之

名元氏子說

君子不器以器待人予其戾哉器有受貴而切於用者有受賤而緩於用者人而至於體無不具用無不周則善茂加矣未至於是為器之受貴而用切者不亦可乎夫料所以受穀也人以食為天世之貴者復有加於是者乎較多寡均出入大而太倉微而田家皆不能闕非切於用者乎惟人之身亦猶料也君子小人初無異焉顧所受何如耳實之以道義文學猶料之有穀焉發而為忠孝

推而為事業猶料之出穀以活世焉無以實之是空料爾若夫納之以異端邪說充之以私慾凶慝流而為荒唐出而為毒螫降衷均善甘迷厥初則是以斗而受冀穢曾穢窳之不若也元君廷幹乞名其子予既以料名之又為之說若是俾料也知所擇云

余孝友政卿名字說

降衷根性非由外鑠明善復初則有待於學焉古之君子惟是是力他不暇也惟名猶服身之章也君子慎之而所心不存焉賢而敝縕不害其正不肖而華不絢其瑕冉耕曰牛匪嘉也而孔門稱德操以德字德何有哉然則士之有志者因其名之嘉思有以稱則亦有益於學焉稱諸口書諸手惕然自警不愈於几杖盤盂之銘乎東魯余君名孝友字政卿居家不愧其名推而從政不愧其字其亦士之有志者乎他日君之子孫其母以是為諱也諱之言

力之行勿使如退之者出舉名仁為人之說則又善矣

名馬氏三子說

予友馬明初請名其三子說明初名熙從火其考諱從木祖從水取五行終始相生之義次當從土故名其孟曰墜字以世完仲曰塾字以世修季曰壘字以世勤古子生父名二十冠則賓字之予不能拒而名之又為賓以字之乃為賓祝之辭祝之曰墜乎而伯子也世其家不在而哉則凡舉其廢者不力可乎塾世其儒壘世其業各有望於女也家也儒也業也豈人各一事而已邪析而言之家貴以勞儒貴以學業戒其惰合而言之責以勞者不知儒與業乎責以學者不知業與家乎戒其惰者不知家與學乎兄弟異體而同氣三人蓋一人也一人必兼三人事而三人必若一人之身則馬氏之後必大矣

名賈氏三子說

愚幼僑鄂知參政鹿泉賈公有大恩德於鄂人入京又知中書大參元播公雍容寬厚真公輔器詢其世參政子也中書子彥宏為安慶總管繼述有聞安慶之子曰棟字士隆今知陵州以愚悉其世也請名其三子且曰吾祖之諱從水棟則從木木之後義當從火蓋以五行更生所生之行轉相承也字書訓燧為火盛火生於木木盛於春象其德為孝名孟以燧字以惟孝南方揚輝執衡司夏為禮名仲以輝字以惟禮焜也者以火伸物也伸於資力力不自致有志以帥之名季以焜字以惟志賈氏鹿泉而下今五世矣上而四世兩至宰執兩為郡守而世隆年富廳任所至籍甚前武未可涯下則三子也其承亦重矣哉孝原百行燧必待孝禮首四維輝必待禮有志事成焜必待志孝也禮也志也推是三者家有

不昌世有不濟其美者乎三者不力徒曰我門大他不我敵則有柳先生鐵爐步志可不懼哉愚於三子聞而知其高見而知其曾交而知其祖若父故名之不辭而於取義也以規不以頌

至正集卷第六十五終

48-11701

